

東
華
續
錄

光緒一百

臣朱壽朋敬編

臣沈彭年恭校

八月庚子諭都察院奏江西京官順天府丞何桂芬等呈稱已故知縣熊存瀚殉節慘烈捐建專祠請地方官致祭並將事蹟宣付史館一摺原任直隸獻縣知縣熊存瀚於同治年間擒匪竄擾時據城固守力竭捐軀業經從優賜卹於獻縣地方建立專祠茲據該府丞等臚陳該故員戰功政蹟著宣付史館立傳其原籍及寄籍專祠均由該地方官春秋致祭以彰忠藎○辛丑齊齊哈爾副都統祿彭卒賜卹如例○壬寅諭潘祖蔭等奏滙陳順屬災賑情形一摺近畿一帶本年水災甚重迭經賞給銀米俾資賑濟茲據奏稱災區太廣飢民衆多轉瞬嚴寒生路更窘實屬情形殊深憫惻加恩著再賞給稻粳米十萬石由京倉撥給作為順天各屬冬春賑需交潘祖蔭等分撥各屬煮粥散放朝廷拯卹災黎有加無已潘祖蔭等當督飭官紳認真經理務期實惠及民毋任稍有弊混所賞米石著倉場侍郎督飭各倉監督認真查看務須乾潔可食之米倘有攙和短少情弊卽著潘祖蔭等據實奏參另片奏普濟堂資善堂兩廠請加賞米石等語著於年賞之外加賞粟米三百石以惠窮黎○劉秉璋奏准總理各國事務衙門咨以重慶

開辦通商停止輪船上駛鈔發原奏並議款六條嗣又准咨以重慶既作爲通商口岸該府本有川東道駐紮應先將如何改設關道如何徵收稅項按結造報及請鑄監督關防開支各項經費分晰奏明各等因當卽先後轉行川東道預期籌辦在案伏惟川省向無通商口岸於徵收支發一切章程均未熟悉屬僚中亦少諳習商務之員今重慶開辦通商必須得所依據始可仿照核辦以定章程臣當卽咨請總理衙門並江浙湖北各督撫臣飭鈔寶波上海江漢宜昌等關開辦章程咨川以憑仿照辦理尤須斟酌損益期臻妥協迄今尙未准鈔錄咨川惟念此次改川東道爲關道須用監督關防若俟各省章程到齊逐款核定後再行奏請恐滋遲誤合無仰懇 天恩勅部先鑄四川重慶關監督關防一顆咨發來川卽以川東道兼監督以便屆時轉發應用一俟各關章程鈔送到川臣當酌量地方情形逐款核定辦法妥擬詳細章程隨時續奏陳懇 聖裁示下遵行得 旨如所請行○丙午諭溥齡等奏應行急修工程請派大臣查勘一摺 東陵殿宇庫房河道橋梁泊岸應修各工著派徐樹銘敬謹查勘奏明辦理○諭魏光燾奏已故提督戰功卓著隨陳事蹟懇優卹一摺已故甘肅新疆喀什噶爾提督譚上連於咸豐年間投効湘軍轉戰湖北安徽江南各省驍勇善戰迭克名城嗣後隨同劉松山及劉銘棠各軍剿辦陝捻甘回並蕩平新疆各城回逆擄穴擒渠厥功甚偉譚上連著照軍營立功後積勞病故例從優議卹生平戰

蹟宜付史館立傳並准附祀陝西甘肅新疆左宗棠祠以彰勞勩○以高家套民墾工竣予張曜等優敘有差○長庚奏濟甯番民與廓爾喀巴勒布番商因行鹽爭棧一案廓番之恃強誣毀所不待言而藏番昧於利害實係積欠過多又以田房押質授人以柄奴才前以藏番既將田房抵押誠恐廓商不肯輕允贖還正深念慮茲據後藏都司蕭占先稟稱會同廓爾喀派來之員及定日戴邵刻已斷定將行鹽生理議立章程並將濟甯番民積欠巴商之款督同唐廓委員逐一算明共應還本利銀一萬二千兩有奇除飭由廓番議去利銀四千兩外實應還本利銀八千兩此項銀兩濟甯百姓凋敝驟難措交請飭由西藏商上墊付限本年八月付清所有巴勒布押質邊界田土房屋全行贖還以後責成營官稽查不准私行典當廓番亦不得押質督同兩處委員發給斷章各蓋圖記兩造番商折服取其遵依切結稟請駁辦前來奴才當經批飭如議妥爲完結以弭弊端並准升泰來咨已飭速結完案下所司知之○丁未夕月於西郊○祭先師孔子廟遣福銀行禮○戊申祭社稷壇上親詣行禮○己酉諭張曜奏在籍大員籲懇開缺終養據情代奏一摺劉錦棠於上年回籍省視祖母嗣據屢次陳請開缺均經加恩展假並諭令伊弟河南候補道劉肅回籍侍養俾該撫得以安心回任朝廷加意體恤不爲不周茲復據奏該撫祖母病益增劇未能遠離仍懇開缺在劉錦棠孝思肫摯原屬出於至誠惟念新疆地方緊要該撫威望

素孚整頓一切事宜諸臻妥協實未便准其開缺劉錦棠著仍賞假四箇月俟伊祖母病體稍痊卽行馳回本任用副朝廷廕念邊陲優加倚任至意○庚戌以鄧華熙爲江蘇布政使黃彭年爲湖北布政使○壬子諭戶部總理各國事務衙門會奏臺灣煤礦招商承辦章程種種紕謬請飭停辦一摺劉銘傳以特旨飭令另議之件並不奏明請旨輒卽議立章程擅行開辦尤非尋常輕率可比劉銘傳著交部議處○癸丑依克唐阿等奏黑龍江自設練軍以來所有緝捕盜匪一切雜差均歸此項兵弁至額設制兵除春秋循例操演外終歲虛閒豈知練軍淵源皆由制兵挑選若不先將制兵整頓勢必愈趨愈弱幾成忘本之虞況此次停撤歸練添設新兵雖有馬隊僅爲常川捕盜之需雖有步軍僅爲試辦屯田之計奴才等伏思各城俱有制兵其大小官員均有守土之責亦卽均有教兵之權此後各城倘遇緩急尤宜責成大小官員督率制兵以期保固地方不得稍形疎懈倘有貽誤卽惟該處官員是問以爲御兵不力者戒如此酌辦庶幾各盡厥職各冀自強用副 朝廷當年設官養兵之至意報聞○乙卯諭御前大臣伯彥訥謨祐現丁母憂著加恩賞銀一千兩經理喪事由廣儲司給發○丙辰諭著廣東瓊州鎮總兵李先義呈遞賀摺繕寫錯誤著交部議處○丁巳諭御史胡華奏京城地面捕務不力請飭整頓一摺京師爲畿輦重地豈容不逞之徒肆意橫行若如所奏近來搶案層見疊出地面官廳互相推諉並不卽時嚴拿捕務

實屬廢弛著步軍統領衙門五城御史督飭所屬遇有搶劫重案隨時嚴拿懲辦毋任匪徒漏網著妥議章程認真整頓不得仍前懈怠以靖閭閻○張曜奏山東黃河凡南岸地方自濮州轄境起以至長清之韓家園頭此六州縣三百餘里向無民埝及下游自齊東起以至利津南岸此三百里間因河身逼窄民埝早經廢修凡瀕海村莊水漲則泛濫漫淹汛漲過後始能消涸低窪之區則終年被淹此兩應賑濟者也其北岸濮范陽穀壽張四州縣臨河一帶連年被水又齊河禹城臨邑商河惠民濟陽陽信等縣係被黃水漫淹其中齊河惠民濟陽三縣沙壓地畝尤多又德平樂陵海豐三縣爲黃連二水同時漫淹其中海豐一縣被災最重又臨清武城清平恩縣臨州等五屬爲運堤漫溢近河數十村莊被災各有輕重又聊城迤西地勢極窪本年陰雨日久被水爲患又泗水曲阜滋陽濟寧等州縣均因山水陡發泗河汶河以及湖水同時氾濫各有被淹之區當經藩司飭派印委各員勘驗災情分別辦理又高苑博興樂安章邱等四縣屬小清河下游因秀江孝女等河水暴注諸泉併發河湖交漲低窪村莊多被淹及又東平州既被山水又爲運河之水漫淹且北接黃流外高內低致被倒灌受災最寬亦最重以上三十七州縣應賑村莊多者三百餘處少者四十餘處雖災情輕重不同均須分別賑濟臣伏查本年春賑事竣賑撫局尙存賑款銀十五萬兩有奇乃自五月杪於被水較重之區由賑撫局司道派委員紳分赴各屬查放

急賑局存之款散放一罄現在應賑地方據賑撫局司道詳加核計約需賑款銀四十五萬兩方敷勻濟
惟本省司庫支絀異常南省義賑接濟有年集款日難臣目覩窮黎倍加焦急惟有籲懇 天恩俯准截
留山東本年漕米五萬石糧道庫存各款銀十萬兩先資散放約計不敷賑銀二十萬兩再由臣與藩司
福潤及東海關道盛宣懷竭力籌資以資賑濟 上諭張曜奏被水地方請撥銀米賑濟一摺本年山東
黃河南北兩岸及濱臨運河各州縣黃流漫溢正值山水湖水同時泛濫濮州等處三十七州縣低窪利
莊被淹災民困苦情形深堪憫惻自應寬籌賑濟著照所請將該省本年新漕截留五萬石並撥糧
道庫銀十萬兩以備賑濟該撫卽飭所屬分別被災輕重核實妥為散放務使實惠及民毋任吏胥稍有
弊混用副朝廷軫念災黎至意○岐元劉東瑋奏光緒十六年三月間據雷波縣通判施毓齡參將謝金
誥統達字全軍馬超選票稱閏二月間雷波縣屬小溝補郎夷支風簸漁姑等甸結西昌生番二千餘人
大股出巢撲擾該縣之牛喇水天姑密等場焚燒房屋掠掠牲畜捆縛民人經該縣並達字營暨曹安右
營等分守隘口次第擊退但該夷仍伏附近老林此地隘多兵少不敷分布等情臣等當卽調派達字左
營唐珊峯前往駐紮牛場並調長勝右營姚振邦前往駐紮黃哪該夷匪復經撲擾牛喇水及黃哪附近
各場經唐珊峯等奮力出擊盡斃夷匪百餘名生擒黑白夷數名立即正法五月二十三日該夷又復句

結吳奇支阿車等各率夷衆四出攻掠復經唐珊峯姚振邦等分路出擊於蓮花石地方接仗大施鎗礮
轟斃逆匪無算生擒夷匪十二名卽於陣前正法我軍弁勇亦有受傷當已分別記功給賞在案近據該
廳營轉據夷差探報叛夷各支因此次傷亡太多俟六月剪割羊毛之後定卽傾巢內犯報仇等語臣等
現又調派先鋒右營劉玉田督隊多帶洋鎗助剿伏查上年馬邊各夷滋擾其時雷波廳屬夷支頗稱靜
謐是以未經剿及今該夷匪輒敢勾結西昌生番出巢疊經我軍擊退仍復潛匿老林狡焉思逞倘蒙
天威藉此數營助剿一戰而服卽可竣事若仍肆擾不退不能不量予進剿查川省營勇分防各處均有
專責礙難再事抽調而雷波隘口紛歧防此輩被各營弁勇已覺疲於奔命與其曠日持久使我民擾害
時虞自須分隊進攻使該夷畏威就撫此後如實不敷分布尙須添勇卽照上年馬邊添勇章程辦理查
馬邊添勇二營於事定後當已裁撤均經奏報在案此次如須添勇亦止暫募二營自成軍之日起咨報
戶兵二部照章給餉仍於事定後裁撤以節糜費得 旨著卽飭令派出各軍嚴行防剿毋涉疏懈○已
未吏部奏軍機處交出光緒十六年八月十五日奉 上諭戶部總理各國事務衙門會奏臺灣煤礦招
商承辦章程種種紕謬請飭停辦一摺劉銘傳以特有飭令另議之件並不奏明請旨輒卽議立章程擅
行開辦尤非尋常輕率可比劉銘傳著交部議處欽此欽遵到部查律載 制書有違杖一百凡官員違

制者係私罪革職等語此案福建臺灣巡撫劉銘傳於 特旨飭令另議之件並不奏明請 旨輒即
議立章程擅行開辦欽奉 諭旨交部議處應請將福建臺灣巡撫劉銘傳照違 制律私罪革職例議
以革職 上諭吏部奏遵議處分一摺福建臺灣巡撫劉銘傳應得革職處分著加恩改為革職留任○
李鴻章奏准戶部咨光緒十六年七月初五日奉 上諭御史崇齡奏災區甚廣請停燒鍋以蘇民困一
摺本年大雨成災糧價昂貴各處燒鍋耗糧甚多誠恐有妨民食著直隸總督嚴飭各屬停止燒鍋一年
以平糧價而濟貧民等因欽此轉行一體欽遵查禁在案茲據口北道吉順宣化府知府汪守正稟稱宣
屬十州縣並張理獨石多倫三屬本年夏秋雨調勻秋收可望豐稔無一災歉之區民間向食苡麵小
米爲大宗至所產苦高粱一項味苦而澀人不能食向來專供燒酒之用燒鍋就地購取實係無妨民食
該道屬統計鍋戶數百家如令停歇一年不特窮民坐失生計且恐商戶貪利私燒吏役藉端訛索爲害
非淺關外地方遼闊查不勝查辦不勝辦即使飭禁徒成虛文難收實效現值天津河間保定等處水災
極重賑款難籌擬援照光緒十二年奏案免其停燒分別資本大小每戶酌捐數十金計可得銀二萬兩
內外解津分撥撥賑於災民殊有裨益等情請奏前來臣查燒鍋之禁乾隆年間直隸督臣孫嘉淦屢疏
剴切上陳以爲無益有損初謂宜於歉歲而不宜於豐年繼且奏稱身親辦理乃知是書生膠論饑饉之

餘民無固志失業既衆何事不爲歉歲難禁似更甚於豐年等語孫嘉淦一代名臣久任畿疆體察民情極爲真切原疏具在可覆按也況口北道屬一府三廳僻在山北年穀順成並無災歉與他屬情形迥異所產苦高粱另是一種人不能食專用釀酒更與他處地產不同據該道府確切查明該屬燒鍋於民食毫無妨礙應請免其停燒仍令按戶酌捐解津助賑以拯災黎其應納本年課銀並令照數赴部完交不准拖欠得旨如所請行○庚申諭許振祿奏已故撫臣勤勞事著懇恩宣付史館立傳一摺已故河南巡撫倪文蔚前以主事從戎旋由知府洊擢封疆歷任廣西廣東等省除患安民政聲卓著其在河南巡撫任內鄭州一役督辦工賑事宜尤能實力實心不辭勞瘁著將生平事實宣付國史館立傳以彰懿績○壬戌諭軍機大臣等朝鮮告訃使臣懇恩請免遣使賜奠懇將頒敕由該使齎回等語該國世守東藩備叨恩禮弔祭專使載在典常豈容輕改特念該國近年國用異常窘乏亦屬實情不得不曲加矜恤此次派往大員改由天津乘坐北洋輪船運至仁川登岸禮成仍由此路回京該國向來陸路供張煩費悉從節省至欽使到國以後應行一切禮儀凡無關冗費者均應恪遵舊章不得稍事簡略並由禮部傳諭該國王知之○李鴻章奏順直各屬向有王公貝勒等府莊田光緒六年御史朱以增請過災酌減租數並田租歸地方官徵解臣以田租改歸官徵事有窒礙奏明仍由各府自行經理嗣因光緒九年水災較

重查照前奏請減租欽奉是年十月十五日 上諭所有王公等府並各京旗莊田著卽自行體察災
歉情形將如何減收租數之處行知坐落州縣出示曉諭不准莊頭攬頭等將已減之租朦混舞弊其內
務府革退莊園頭官代徵地租香燈租步軍統領衙門西河歲修地租一體減免五成如有災前花戶
長完租項准抵次年之租積年民欠均緩至下年秋後起徵出示曉諭十二年復被水災又經援案奏請
減免各在案茲查順直各屬窪區本年水勢之大被災之重較之九年十二年爲尤甚業經臣等節次陳
奏一面籌辦賑撫並遵定章飭委道府督勘災歉分數另行照例籲懇 恩旨豁免糧租先行照章曉諭
停徵復據通州等州縣稟稱被災之處田禾既失收成虛舍又多倒塌甚有積潦未消卽春麥亦難播種
民情困苦異常所領賑款僅堪度命各府莊頭攬頭地畝應交租錢實屬無力完納稟請奏辦前來臣等
查順直此次災區正項糧租例得懇 恩豁免賦課先行照章停徵又欽奉 皇太后懿旨節省宮廷用
項賞發順天賑銀五萬兩並蒙 皇上賞撥順天銀五萬兩大錢五十萬串倉米共二十萬石以賑糴米
一萬二千七百餘石漕米三萬六千石並將新海防三箇月捐款移作順屬賑需 恩施優渥感戴同深
王公各府仰體 皇仁自必將災區地租照案核減惟經手之莊頭攬頭人等暨否不一誠恐從中朦混
全數追呼再墊餘生難禁股例仰懇 天恩俯准照案特諭王公員勒各府並京旗自行體察坐落州縣

災歉情形將莊田減收租項其內務府各項地租步軍統領衙門地租一體減收查上兩屆內務府係不分災歉一律減免五成此次災情尤重似應照辦王公貝勒並各京旗步軍統領衙門是否亦減免五成並各迅速酌定知照直隸轉行坐落州縣出示曉諭俾窮黎得沾實惠其有災前花戶長完及上年預行全收長出租項准抵次年之租節年民欠均緩至次年秋後啟徵以紓災困臣於奉 旨後卽敬謹刊刻謄黃先行委員分往被災州縣村莊張貼並令於催收時先按五成完交仍俟各處核定減免成數再行由州縣曉諭遵照其有上年業經預交者無庸再交至各州縣未被災歉村莊仍照十成完交不得減免倘有莊頭攬頭夫役人等串通弊混及奸民影射抗租照例懲辦各屬紳民地畝內有佃戶承種交租者既被災歉亦令一律減收以昭公允 上諭李鴻章奏順直各屬被災請將京旗各府莊田照案減收租項一摺本年順天直隸各屬水災甚重民情困苦災常朝廷憫恤災黎迭經賞發銀兩撥給米石以資賑撫所有王公貝勒各府並各京旗莊田著卽自行體察災歉情形將如何減收租數之處行知坐落州縣出示曉諭不准莊頭攬頭等將已減之租朦混舞弊其內務府各項地租步軍統領衙門地租並著查照成案一體減收以紓民困○乙丑諭前任陝甘總督楊岳斌忠勇性成勳勞卓著咸豐初年隨同前大學士曾國藩剿辦髮逆創立師船由湖南湖北安徽江西直達江甯肅清江面數千里厥功甚偉同治三年

克復江甯郡城蒙

穆宗毅皇帝念勳勞賞給一等輕車都尉世職並賞加太子少保銜旋由福建提

督簡授陝甘總督嗣因親老准其回籍終養朕御極後命巡閱長江水師整頓營規均能妥協上年服闋後奏准在籍養病方冀調理就痊長承倚畀茲聞遽逝軫惜殊深楊岳斌著追贈太子太保銜照總督例賜卹任內一切處分悉予開復應得卹典該衙門察例具奏加恩予諡並於立功省分建立專祠其生平戰功事蹟宣付國史館立傳伊子附生楊曾儀著賞給舉人准其一體會試伊孫候選縣丞楊鎮榮著以知縣補用楊道讓著俟及歲時由吏部帶領引見用示篤念蓋臣至意○賞給廣仁堂米三百石○丙寅裕祿奏查奉天地土寒濕民間房院率皆堆積柴草備烘炕近午不法匪徒每因挾有宿嫌或計圖得財昏夜放火燒人房屋被害之家老幼嗷嗷坐以待斃甚至一連數戶家業蕩然其險惡情形較之行劫盜匪尤爲狠毒雖經歷任將軍出示嚴禁並拿獲多起照例懲辦而惡風猶未止息如此次拿獲放火匪犯陳起汶梁五珍二起一則挾仇幾次放火並敢擲甌拒捕一則假託神道幾次放火圖財逞邪肆惡擾害多家實屬險惡性成督不畏法現經奴才審明按例定擬奏請卽行正法聽候部議惟思除惡期於務盡立法實乎因時矧奉天爲根本重地戡暴綏良尤關緊要豈容此等棍徒爲害閭閻相習成風恣行無忌似非稍加嚴懲不足以安良懦而儆奸頑查挾仇圖財放火已經燒燬房屋間擬斬絞監候之犯秋審

均應入實本屬情無可原法無可貸若照軍具題驗候部覆入於秋審辦理則動經歲月不能立正典刑匪徒無所儆畏自不如早彰顯戮以昭炯戒俾匪類共知斂跡擬請嗣後奉天省遇有此等惡徒放火之案除罪應斬決外其爲首爲從應問斬絞監候之犯均照現辦嚴懲土匪章程奏請卽行正法爲從罪應軍流之犯均從重發往雲貴兩廣極邊煙瘴充軍俟數年後此風稍息再請仍照舊例辦理庶期辟以止辟以仰副 聖主刑期無刑之至意下刑部議奏○是月法蘭西國使臣李梅回國天津總領事林椿署理○比利時國使臣維禮用回國參贊米師麗署理

九月戊辰朔諭軍機大臣等李鴻章兩電均悉朝鮮告訃使節錄諭旨電其本國並無改易字句之處袁世凱遽以不符電告殊屬冒昧著李鴻章傳旨申飭○命出使英國大臣薛福成恭齋國書致謝英君主其文曰 大清國大皇帝問 大英國大君主兼五印度太后帝好前以朕躬慶典 貴國使臣華爾身恭傳 大君主雅意申賀茲復由 貴國使臣華爾身齋到國書並自鳴鐘一座良工巧製十二時備致嘉祥吉語遙頒億萬年永膺福祚接閱之餘莫名欣悅我兩國 國家和好有年益敦睦誼今特派駐劄貴國大臣薛福成恭齋國書親遞致謝從此邦交永固共享昇平朕實有厚望焉○辛未裕祿濟祿奏查向例 盛京通省官兵額設監甲鎗礮弓箭每屆三年由 盛京兵部侍郎前往點驗一次道光八年

前任將軍奕瀨以從前侍郎每屆點驗之期帶領官員家丁書役前往各城需費較繁奏奉 上諭嗣後盛京兵部點驗軍器之例著照所請停止飭令各城尉協每於年終將一切軍器是否整齊造冊咨送兵部存查仍責成該將軍隨時酌量密委委員前往抽查以期核實等因欽此嗣於道光十九年六月奉 上諭據御史阿克丹奏請揀員點驗盛京軍器一摺盛京兵丁素稱勁旅器械尤須堅銳嗣後每屆三年點驗軍器著該將軍前期開列將軍五部侍郎及副都統銜名具奏請旨簡派欽此道光二十二年復經前任將軍禧恩奏奉 上諭禧恩奏請將官兵軍器送省點驗一摺著照所請盛京官兵軍器著自平壤撤防之日起每屆三年開列將軍副都統五部侍郎銜名奏請簡派一二員將各城軍器調至省城公同點驗欽此各等因欽遵辦理在案嗣因咸豐年間官兵奉調出征或設防海口或在外緝捕咸豐四年七年十年三次點驗之期均隨時奏准責成各該尉協就近核實點驗追同治二年以後至光緒十三年歷屆九次點驗年分內除光緒十年十三年兩屆因辦理海防援案奏准責成各該尉協就近點驗外其餘七次皆因地方盜賊不靖仿照舊章稍為變通奏請 簡派大員就近點驗省城官兵軍器其 興京金州錦州所屬地方即責成該副都統點驗仍由將軍衙門彙總咨送兵部查核今自光緒十三年起扣至本年九月又屆三年應行點驗之期所有官兵軍器原應照依調省點驗之案辦理惟現在奉省官兵疎

隊分布各處駐防緝捕若將外城軍器全數調省點驗各外城距省七八百里一二百里不等往返須至月餘倘遇要事有兵無械且長途載運需費浩繁或有損壞併須實補皆由總兵備辦未免苦累奴才等詳加籌酌擬請仍照光緒七年以前歷屆奏請變通章程分別點驗開列將軍副都統五部侍郎銜名清單奏請 簡派一二員點驗省城官兵軍器具 興京金州錦州海龍城所屬各城官兵軍器卽與成各該副都統總管點驗造冊咨報將軍衙門存查至遼陽等四城以及各路邊門官兵軍器嚴飭該副協就近核實點驗仍由奴才等遴派委員密往抽查務期一律整齊加結造冊詳報彙總咨送兵部查核倘各該副協驗報不實或抽查委員扶同結報一經查出卽行隨時參辦如此分別辦理既無供應之煩又免運送之費而於緝捕操防等事均有裨益得 旨如所議行○壬申諭長庚升泰奏揀員請補戴坤一摺前藏賊汪青洛布年老辭退一缺著升巴明足爾調補所遺之缺著擬正四郎汪青補授○諭升泰奏請調員差委等語四川儘先參將喻立成順慶營遊擊何長榮著四川總督卽飭該二員前赴西藏交升泰差遣委用○甲戌予故江蘇吳縣紳士潘曾瑋建祠列入祀典○長順依克唐阿恩澤奏理春前修葺臺安縣縣衙爲拘緊運用不靈奴才依克唐阿自備經費助修或成靖邊中前兩路統領督飭營哨等官變更修造曾於上年四月間奏明俟修補完竣做位安齊由奴才長順派員驗收再行奏報並由吉林每

年籌款三百金以作歲修之費永爲定率 旨該部知道欽此欽遵在案茲查理春改修礮臺工程完竣礮位安齊據靖邊中路統領二品銜記名協領花翎佐領永得前路統領頭品頂戴記名簡放副都統雲騎尉世職花翎佐領莽阿巴圖魯王寬先後呈請派員驗收奴才長順咨由奴才恩澤就近派委佐領春陞候選知縣曲冰勝候補知縣王國楨等會同勘驗該兩礮臺工程委係工堅料實並取具承修各員印結加結呈報前來奴才恩澤親加覆驗無異奴才依克唐阿查此次改修礮臺經費係屬自行捐廉助修應請毋庸報銷奴才長順查歲修款項擬自明年起每年由邊餉項下籌銀三百兩作爲歲修之費以期久遠而資堅固下部知之○長順奏三姓礦務前經奴才長順將委員勘明礦苗及予限暫時試探情形於本年六月二十一日詳細奏明次日接奉 廷寄著李鴻章會同長順遴委幹練之員前往三姓切實履勘議章擬奏等因欽此當經電准李鴻章飭令督辦漠河礦務候補道李金鋪派員往勘在案茲據試探三姓金礦委員恩齡等稟稱試探金礦限期屆滿所有金夫遣散已盡有業者諭其歸業無業者飭令回籍不准逗遛仍嚴行封禁俾免進溝偷挖等情並據將所抽課金自行解交前來奴才長順查此次採礦兩月有餘共抽課金六百四十四兩八錢二分五釐除解呈海軍衙門五十兩北洋大臣十兩考驗並開支經費銀一千七百六十七兩二錢六分六釐核計用金一百二十九兩八錢二分四釐外實存金

四百五十五兩零一盤以備將來開採經費下所司知之○乙亥諭前據御史端夏奏祿米倉虧短甚巨當派戶部堂官認真盤查完竣開單呈覽並請將花戶人等分別飭拿嚴究興廉等奏倉米虧短將監督參處並自請議處各摺片倉庾正供豈容稍有虧缺祿米倉米石光緒十三年經倉場衙門查明虧短梗米六十餘石現經戶部盤查竟虧至十五萬五千餘石之多總由花戶倉匪因緣爲奸監督各員漫不加察以致積成巨款深堪痛恨亟應從嚴究辦以昭儆戒所有拿獲之花戶郭啟謬及全才張六卽張世和等著刑部嚴行審訊究出虧短確情按律懲辦應如何著落賠補之處俟定案後由戶部酌核成數奏明辦理在逃之花戶張增祿王德海馬得山倉陶賦何桂林著步軍統領衙門順天府五城御史按名嚴拿務獲送交刑部歸案訊辦該倉監督戶部主事容恩都察院都事孟守觥職司典守於倉儲虧短毫無覺察實屬形同曠職且恐有徇隱侵漁等弊均著先行交部議處撤去監督之任聽候傳質倉場侍郎興廉游百川未能先事覺察亦有應得之咎並著交部議處○戊寅以景善兼署戶部左侍郎文興兼署吏部右侍郎巴克拉布兼署戶部右侍郎祥麟兼署工部左侍郎○辛巳許振禕奏准軍機大臣字寄光緒十六年六月十三日奉 上諭給事中張廷燦奏河南河工積弊亟宜革除並陳管見一摺等因欽此遵 旨寄信前來臣欽奉 訓諭周詳莫名感悚惟時撫臣倪文蔚已因病出缺臣自接河篆未及兩月

卽馳抵工次搶險一切積弊未及周知因與護撫臣廖壽豐會商札派委員密查在案臣維聖主有核實之政則羣才鼓舞當共奮於功名微臣忝宣防之司當激發天良何敢避夫勞怨臣昔官河北道值欽差大臣孫毓汶烏拉布奉旨查辦河工臣卽以改革裁款之說進幾爲通工之所不容今復叨荷天恩畀以全河總任是臣仰酬高厚生成在此時矣履任以來痛自振刷誠不免矯枉過當然臣必以坦白習勤可任屬僚之推究庶幾執法整頓亦當退無後言今按張廷煥所奏其指斥弊端未必無因臣應詳查禁革其條陳辦法略得近似尙須切實講求如所稱由司發款道屬皆具空文印領由該道填註數目填註一萬只發五千此五千復有折扣等語臣官河北道時歷查各前任未曾有此推之開歸道亦當復然顧此語風傳已久密訪各屬誘之使言且囑無所顧忌不妨揭出以紓患苦乃該屬等合詞稟覆堅謂無之意者大汛將臨該道每酌留若干以爲搶險之用工多則多給遂有參差而領款少者不免怨望物議之來或卽由此至折扣一節查除減平部飯等項應隨發款坐扣外未聞別有折扣若霜酬名目早經查禁停止自鄭工失事河上益復彌條雖查無確據之弊端不得不變法以杜其隙應如張廷煥所擬准令各屬員赴司領款則兩道不與支放之事自可不沾剋扣之名稽查維持實有裨益臣等仍通飭所屬大小衙門如有折扣偷減情弊除嚴參治罪外仍按款追繳不貸至近溜築壩一節本係正辦臣初

至力主此說今搶險一次乃知小險則拋石可禦大險則非廣用稽料鮮有濟者磚石保常稽料保變此定理也石像既多自可省埽亦定理也然其要在得人有明決可用之人卽有確切不欺之工且必有簡便不多之費謂立一法而能永除積弊者從古無是道也謂得其人而不能破除積弊者亦無是理也張廷燦又請酌提一成爲各衙門辦工之需查河南司道府廳皆經涂宗瀛奏定公費而以開歸河北兩道屬之河工事同一律自應給予公費現查督撫兩道七廳共十一衙門自藩友委員差官至胥吏外工走卒月領口糧者不下數千人約計非七萬五千金不敷擬請以此垂爲定額亦僅少逾一成之數此臣等就張廷燦所奏斟酌妥議之實在情形也抑臣更有請者河工誠爲漏卮朝廷豈不深知特以天事無定故每不能責實不知河或改道北流改道南徙此自天意不關人事然必數百年而一變或數十年又若前歲鄭工潰決全河奪准入湖奔流年餘並未入海不知此水消歸何處此自變異不可以人理測他若各廳修守皆有積章歷年河勢可得大概但使去隱飾而殫實心卽可籌穩計而得良法何至年年添歛事事頽廢在工尙以爲不足局外直斥爲侵漁臣實羞之故改章之舉早蓄此念言官條陳河工重在惜費臣之條陳河工重在保險而後籌減費人之所共知也先減費而後任保險人之所不敢言也此事固非改章不能行實非河臣身任其事亦不能行臣請先臚積弊後明辦法一一爲我皇上陳之其一

曰把持之弊各署皆有幕友河工獨曰庫儲其餘例案全不知之獨鈔撮部中報銷之冊以爲秘本其在河督署中者則以險工恐嚇使之不敢疑議吏張而於奏報無工處所亦必故作張皇鋪排以爲見好受酬地步其在河道署中者則以力請添款暗阻發款爲務其在各屬署中者則以節省工料勒留銀錢爲務此弊不除各官皆爲蠹蔽而河工受累尤深故臣初次抵任卽不延用庫儲衆論譁然臣不爲動其二曰糶餉之弊各屬歲辦稽料磚石本係領款所購而於交卸時復將餘存列入交代且於道庫陸續扣領故有已故總員其子孫仍支領一二十年者因之有料亦不辦公留積異日家私其實稽料早化灰塵磚石亦歸烏有紙上鑿空坐收實利此弊不除實屬不成事體故臣此次改革於霜降後查取各屬所存稽料磚石概行充工不准再立交代名目以斷弊端其三曰失算之弊大凡稽料早買則價廉後買則價貴磚石先辦則有濟後辦則無及同一支放早則可供急變之需遲則必有貽誤之患查河工款項名目紛紛有所謂額款者有所謂奏添節省防險者有所謂另案磚工埽工土工石工者其實皆取之司庫分別各名以便報銷而弊端卽由此出約計每年報銷六十餘萬兩而司庫必陸續撥給或遲之又久而撥給有事不能爲先時之備無事究可便中飽之私以至遇險而做辦墊用河工尙不能稽核部臣又安得而考察之哉此弊不除無從核實今臣擬定改革每年請款卽以六十萬爲率尋常搶險似可不必加添而

將各種名目概行不用特定名目曰歲修額款六十萬而已擬請司庫定於每年十月發四分之一以辦
繕料磚石次年二月發四分之一以辦春鑲埽工次年五月發四分之一以辦大汛防險次年七月發四
分之一以辦營後各工眉目粲然免至所報非所用所用非所報於是河督道廳人人有保固之責不得
不講求不得不節省無意外之希冀則必無意外之鋪張有先事之取資即可責先事之實政按時課功
不能過飾其四曰忙亂之弊河臣以公事實之兩道兩道以公事實之七廳七廳以公事實之外工問其
底蘊半未深悉遇有險工加倍張皇即求添款計較已定先請河道次請河督至則人工紛紜無從稽核
用料無料用石無石臨時採辦輒稱借墊河道茫然河督默然但添款了事而已不知歲領之款所辦何
事何至有工即爾竭蹶謂之無弊其誰信之此弊不除則奏報幾無實話臣愚以爲既爲此官則當各任
其事與其因人誤事而自被罪不若奮身認事而可認真故臣此次改革擬以身先羣屬先事預防庶不
淆混四弊既明然非另設河防一局究竟不能更易舊轍積久終屬空言何也河工習氣已深耗費亦甚
即發款盡歸屬員而屬員每辦一工實比外人所辦昂貴數倍蓋其受制非止二人開銷不止一二處
所從來遠矣各屬如此一屬豈能獨異印委員弁可借上司彈壓至於不在官之人招用不能過嚴也應
分潤之人有工不能盡省也臣擬設局比較庶可除去其弊如同辦料石臣局之所報如此則各屬之價

豈得頓相懸殊每遇險工臣局先有人專司則各屬之人究亦無從蒙蔽故臣擬請歲支司庫銀六十萬其四十八萬概歸七廳赴司分四次領支另提十二萬兩設一河防局由臣主之所委各員不分河工地方總求廉介精細熟諳工務之人不拘人情務實實效其銀亦不入局寄存藩司外庫凡領銀辦工由工員開陳實數俟提調核定兩道上詳臣即批准赴司領取總求涓滴無不至工並比河工格外省費一錢可作兩錢之用如復有弊臣願一人獨承其罪且先期相視險要廣儲料石無論何處有工即飭局員飛馳辦理用屬員之兵夫動屬員之存料如有不足概行取給河局屬員過工除將派定所備料石雜料用畢後即算無事不必另稟以杜朦混求添之弊凡河局專管先時籌備臨時策應隨時稽查且可代任勸勞代承責任代爲稟報以臣拙見所揣照此行之應可弊絕風清不必另請添款似無意外之虞惟此係實用實銷將來各廳報銷仍按舊章辦理河局報銷只能據實開單惟乞勅部臣少從寬假庶臣得以董率各員共竭心力以保險工而免浮費事如有效仍按兩年安瀾將委用各員籲乞天恩從優給獎俾人人自奮於功名之路而盡破保其身家之私如此真僞相仍勸惰相較物料充積石壩林立謂兩岸工程從此不日有起色者臣不信也旨下節交分河流順軌足以仰紓聖慮得旨如所請行○壬午諭御史吳兆泰奏請停止頤和園工程一摺頤和園殿座即係從前大報恩延壽寺爲高宗純皇帝

侍奉 孝聖憲皇后三次祝嘏之所殿宇一切均係舊有工程朕仰維 慈禔端佑康頤昭豫莊誠壽恭
欽獻皇太后垂簾聽政二十餘年宵旰憂勤不遑暇逸朕親裁大政自應倍隆頤養以冀稍近孝思是以
將原有工程量加修葺恭備 慈輿臨幸藉資養性怡神並擬於 大慶之年敬踵乾隆年間 成憲躬
率羣臣同伸祝忱此朕區區尊養微忱庶幾仰報萬一並非創興土木自侈遊觀光緒十四年二月所降
諭旨其明天下臣民當已共諒該御史備員臺諫豈猶未知乃輒以工作未停有累 聖德並以訛輔被
災河決未塞等詞摭拾瀆陳是於朕孝養之心全未體會實屬冒昧已極吳兆泰著交部嚴加議處○癸
未諭吏部奏遵議處分一摺祿米倉監督戶部主事容恩都察院都事孟守箴均著照部議卽行革職倉
場侍郎興廉游百川均著降一級留任不准抵銷○以永定河漫口合龍予直隸臬司周馥等獎敘有差
○賞給崇善堂煮賑米石○庚寅諭本年朕二旬慶辰業經覃敷闔澤將在京大員老親年逾八旬者優
加賞資茲據京外各衙門續查尙書銜甘肅新疆巡撫劉錦棠等老親均年逾八旬祿養承歡允宜一體
施恩以昭盛典尙書銜甘肅新疆巡撫劉錦棠之祖母陳氏著賞給御書匾額一面紫檀三鑲玉如意一
柄大卷江綢袍褂料二疋大卷八絲緞袍褂料二疋西寧辦事大臣薩凌阿之母王氏山東布政使福潤
之母烏蘇氏廣東水師提督方耀之母林氏直隸馬蘭鎮總兵英廉之母郭氏河南歸德鎮總兵牛師韓

之父牛斐然均各賞給御書匾額各一面紫檀三鑲玉如意一柄小卷江綢袍褂料二件小卷八絲緞袍褂料二件用示錫類推恩至意○辛卯沈秉成奏 訪聞皖南一帶地方時有會匪嘯聚成羣糾眾滋擾大爲民害當經通飭各屬暨各營一體嚴密巡緝並將保甲事宜實力查辦以戢匪蹤去後復據石埭縣知縣顧懷王稟報縣屬十三都七里村地方聞有匪黨滋事剽掠婦女情事卽經會營率屬親督丁壯馳往掩捕並據被害民人唐英才赴縣首告當在附近山麓嚴加搜緝先後拿獲匪犯唐玉荊謝海山吳春泉陳慶塊宋雀焦胡長和徐三黃七名起獲刀矛鎗劍及黃綾旗幟多件並將被搶閩女唐氏奪回給親完聚餘匪逃竄查驗旗幟上寫雅龍洞周字標訊據唐玉荊謝海山吳春泉三犯均各供認聽從在逃之江西鄱陽縣人周子意起意邀入哥老會商同謀反約期舉事並幫同周子意前往唐英才家搶奪其妹唐氏欲圖強占爲妻等情不諱並據供稱唐玉荊已受九千歲僞職謝海山已受唐國公僞職又在逃之錢萬有鄒金山俱稱爲白袍將余登長稱爲黑袍將余臘梨稱爲藍袍將黃亮鳳稱爲綠袍將曹起信稱爲指揮各帶礮隊二百餘人等語訊之陳慶塊僅止被誘入會不知謀逆重情宋雀焦等三名供稱誤擊並無入會爲匪情事 臣查匪首周子意係江西鄱陽縣人而石埭建德又與江西省連界現值該匪糾眾倡亂約期謀反誠恐內地奸民乘機煽動造言煽惑民不安生且慮萬山叢雜之中或有逃匪竄匿鋌而

走險隨於省城練軍選派精練勇丁遴委營弁陳兆堂管帶馳往建德一帶入山搜捕兼資彈壓以定人心並函致皖南鎮總兵史宏祖酌派馬隊駐紮石埭會同巡緝一面飛飭江皖附近各州縣合力緝緝並咨江西撫臣迅飭鄱陽縣移撥營勇不動聲色會合兜擒期在必獲一面懸立重賞購募眼線設法密捕嗣據建德縣茲國城陸續拿獲匪犯余登長即余老二錢萬有曹起信即老曹鄒金山余臘梨余登雲大名除余登雲一犯訊係被誘入會不知謀情外餘犯均與唐玉苟等所供大略相同經臣飭委候補知府鄒增翰候補直隸州知州王懋勳前往各該縣提犯訊明確供具稟請示旋聞匪首周子意逃匿江西鄱陽樂平兩縣交界之接竹渡地方該匪首臂力過人頗知拳勇聞其口內能發鋼鏰七支蹤跳如飛使人莫敢近前尚有敢死之夥熟數十人擁護左右非集兩省兵力四面搜拏不敢迅速擒獲復經密約江西撫臣飭鄱陽縣知縣賀宏勳約會管帶親兵前營總兵張祖恩選帶健勇會同建德縣知縣黃國城並臣所派練勇親往該處嚴密訪察該犯首周子意隱匿姓名攜妻汪氏假充行醫在街游弋竊探消息賀宏勳黃國城等探知蹤跡改裝易服尾隨圍捕該匪首率眾抵禦且拒且走刀傷勇丁數人適陳兆堂督勇踵至會合兜拏將左右衛護多人奮勇擊散該匪首力不能支當場擒獲並其妻汪氏一併拏獲起出彈據兩本由江西撫臣派員押解到省酌提前獲各犯環質無異並據供稱伊妻汪氏甫於本年五月初間

迎娶過門不知謀情假之汪氏堅稱周子意如何糾人如何約期起事伊全然不知再三究詰加以刑嚇供仍如前辭由臬司審議擬解勘到臣親提研鞫緣周子意即得太父名周受善錢萬有余登長即余老二曹起信即老曹唐玉荀謝海山吳春泉鄒金山余臘梨分隸江西鄱陽湖口安徽懷甯石埭宿松等縣周子意與唐玉荀前在軍營充當勇丁後因事斥革回籍游蕩度日光緒十五年不記月日該犯錢萬有余等先後會過周子意談及伊係哥老會大頭目會內夥黨約有數百人分散各處四出勾結授以旗號口號旗號是雅龍洞周四字口號是雅龍洞流海周大字有人入會給予小旗一張遇有同夥暗述口號彼此知照謝海山自稱軍師能知過去未來事稱周子意是飛天白虎星下世能成大事遂糾合各犯入會傳授旗號口號各散本年四月間周子意在茅洲地方曹起信家遇見該犯錢萬有余等告知現已置備鎗礮器械約期五月十三日攻打建德城周子意即將唐玉荀謝海山鄒金山錢萬有余登長曹起信余臘梨並黃亮鳳給授偽職約在茅洲地方會齊起事周子意又聞唐玉荀族人唐英才之妹唐氏年輕貌美意圖娶爲僞妃令唐玉荀往說唐英才不允五月初十日周子意令曹起信在家保護眷屬帶同錢萬有余等多人各持刀械僱坐車轎前往強搶周子意勒令唐英才將其妹交出並令將合家老幼帶去同享富貴否則全行殺戮唐英才倉猝無法致被搶拉出門仍由茅洲一路回去嗣經石埭縣訪聞查拏並據

唐英才赴縣首告先後獲犯唐玉苟等並將唐氏奪回旋據建德縣陸綱舉獲錢萬有等在江西地方獲犯周子意解省提同各犯實審無異究鞫不移似無遁飾臣伏查該犯周子意等膽敢在於江皖交界之區勾結數百人之多邀入哥老會並捏造狂妄不經之談倡立名目授僞職置備軍械約期攻城起事查該犯等情多悖逆不軌情節顯然該匪復於光天化日之下強搶幼女併敢率眾逞兇拒敵官兵實屬罪大惡極未便稍稽顯戮應卽循照光緒八年刑部議准章程批飭將該犯周子意錢萬有余登長曹起信唐玉苟謝海山吳春泉鄒金山余臘梨分別先行就地正法傳首犯事地方懸竿示眾以昭炯戒犯妻汪氏訊不知情應免查究飭縣傳屬領回認其去留陳慶塊余登雲止被誘入會情尚可原惟現屆會匪出沒無常辦理不容輕縱應將該犯等遞回原籍永遠監禁不准釋放宋雀焦等三名訊無入會爲匪情事分別遞籍保釋以省拖累所有此次在事出力之江西鄱陽縣知縣賀宏勳等親督兵勇不分畛域會同建德縣跟蹤追捕設法密拏使元惡俯首就擒餘黨一律解散消患未萌有裨益於江皖兩省民生者不淺臣正在整飭地方嚴懲匪類之際既經有功足錄似宜量予獎勵合無仰懇 天恩俯准將花翎運同銜江西候補同知鄱陽縣知縣賀宏勳請俟補同知後以知府仍留原省儘先補用花翎四品頂戴升用直隸州知州安徽建德縣知縣黃國城請俟補直隸州後以知府仍留原省儘先補用江西撫標

右營花翎補用總兵張祖恩仍以總兵遇有缺出請 旨簡放並請 賞加提督銜安徽撫標右營花翎儘先補用都司陳兆堂請補都司後以游擊儘先補用俾資鼓舞至石埭縣知縣顧懷壬當外匪潛入之初不免疏於防範惟一經訪聞卽行星夜追捕緝獲匪犯多名並將被搶閩女奪回辦理尙屬迅速且值亂機已露若非該員首先訪拏立擒各匪嚴辦並究明在逃匪首及各匪黨姓名俾黃國城等得以按名捕獲盡法懲治幾致滋蔓難圖禍患不堪設想亦未便置微勞於不議轉令獨抱向隅可否將該員顧懷壬請以直隸州知州在任候補之處出自 逾格鴻施其餘出力稍次各員升容由臣分別酌給外獎以勵人心 上諭沈秉成奏拏獲滋事會匪請將出力各員獎敘一摺匪首周子意本係哥老會頭目膽敢在江皖交界地方造言煽惑糾衆倡亂約期起事實屬惡不畏法經沈秉成督率營縣拏獲匪黨唐玉栢等七名查獲軍械旗幟多件復派練軍弁勇跟蹤追捕續獲余登長等六名旋在江西境內擒獲首犯周子意當卽訊明將首犯周子意及匪黨錢萬有等就地正法勸示餘犯分別懲治辦理尙爲妥速在事出力員弁著有微勞自應量予獎敘江西鄱陽縣知縣黃宏勳著俟補同知後以知府仍留原省儘先補用安徽建德縣知縣黃國城著俟補直隸州知州後以知府仍留原省儘先補用總兵張祖恩著仍以總兵遇缺請旨簡放並賞加提督銜安徽補用都司陳兆堂著俟補都司後以遊擊儘先補用石埭縣知縣顧

懷王著以直隸州知州在任候補餘著照所議辦理在逃之匪黨黃兆芳等並即按名嚴拏務獲究辦毋任漏網○壬辰諭戶部奏工多費繁請分別次第以節錢糧一摺本年京師雨水過多各項應修緊要工程自應次第修理惟國家經費有常豈容藉端開報稍滋糜費所有各衙門報修之案除業經奏准估有確數各工准其修理外其並非因雨坍塌滲漏者一概不准呈報請修以杜含混至已報未估各工並著查估大臣詳加履勘分別緩急將並非因雨及情形較輕之處一律奏明停緩以重款項而昭核實○戶部奏河東河道總督許振祿奏查革河南河工積弊更章設局保險節費一摺光緒十六年八月二十二日奉 硃批著照所請該部知道欽此欽遵由內閣鈔出到部據原奏內稱河工重在保險先保險而後減費人所共知豫省河工款項名目糾紛有所謂額款者有所謂奏派節省防險者有所謂另案磚工掃工土工石工者約計每年報銷六十餘萬司庫或遲之又久而撥給有事不為先時之備無事可備中飽之私今擬定改章每年請款即以六十萬兩為率尋常拍險不必加添將各種名目概行不用特定名目歲修額款六十萬兩內四十八萬歸七驛赴司分四次支領另提十二萬設一河防局由委員赴司領取總求涓滴到工如復有弊該河臣願獨承其罪並稱給事中張廷燦奏河南河工積弊宜革請酌提一成為各衙門辦公之需查河南督撫兩道七驛共十一衙門自幕友委員差官胥吏外防工走卒月領口糧

者不下數千人計非七萬五金不敷請以此垂爲定額等語臣等伏查豫省河工同治二年間前河臣譚廷襄奏定歲修款目不過二十萬兩未幾而歲修之外復請添撥每年多寡無定自光緒十年欽差孫毓汶烏拉布查辦河工奏明節省以後每年歲修及添撥銀兩或四十餘萬或五十餘萬極多者方至六十萬今該河臣請以六十萬定爲歲修額款較近年用過數目並未裁減且有加增在該河臣統籌全局重在保險掃除積習獨任其難業經奉旨允准臣等自應欽遵辦理原奏整頓尋常搶險不必添撥各種名目概行不用改定河工歲修額款六十萬兩一切布置當已裕如自不得再有加添之款其公費銀七萬五千兩卽由六十萬額款內支給該河臣每年既有此的款搶險各工自當益加穩固此後隨時有可減省之處亦應據實奏明以節經費並請飭下河東河道總督慎選廉介之屬員力杜折扣陋習於歲額既不能裁減則保險必責有攸歸毋事更章轉生他弊是爲至要上諭戶部奏豫省河工歲修額款較前加增請飭核實辦理一摺豫省河工款項名目繁多前據許振祿奏請改定章程每年以六十萬兩定爲歲修額款尋常搶險不再添撥各種名目概行不用當經降旨允准茲據戶部奏稱向來河工歲修經費至多不過六十萬兩該督所定額款一切布置當已裕如其公費銀七萬五千兩卽由六十萬兩內支給等語著依議行河工關係重要許振祿到任後於一切修守事宜尙能破除積弊認真經理故

於前奏請撥鉅款當即允行該督務當仰體朝廷委任之意振刷精神切實整頓悉除向來一切浮冒折扣陋習使工程益臻鞏固用副朕軫念河防慎重帑項至意○癸巳賞給普濟堂煮賑米石○丙申諭昨據秀吉奏義園進南庫門鐵鎖脫落當經諭令內務府大臣確查具奏茲據奏稱本月二十七日衣庫司員呈庫門對條鐵鎖有拆卸扭落情形查點物件失去繕護三件等語禁城重地有賊匪觀竊情事殊屬不成事體著護軍統領認真緝訪並著步軍統領衙門五城御史一體嚴拏務獲送部究辦

冬十月丁酉朔時享 太廟 上親詣行禮○諭劉銘傳奏總兵在營積勞病故懇恩優卹一摺福建建

寧鎮總兵蘇德勝於咸豐年間投効軍營轉戰江蘇浙江山東湖北等省迭著戰功洊保記名提督前經劉銘傳調赴臺灣剿辦生番深資得力遂以感受瘴氣在營病故蘇得勝著加恩照提督軍營積勞病故例從優議卹准其於臺北府城建立專祠生平戰績宣付國史館立傳以彰勞勩伊妻徐氏絕食殉節著准其旌表○以羅大春爲福建建寧鎮總兵○戊戌諭敬信汪鳴鑾奏查辦事件遵旨覆奏一摺前據都察院奏福建臺灣布政使于蔭霖以辦糶啟釁句串朋謀搆陷大吏覆奏不實等詞赴該衙門呈訴當經諭令敬信汪鳴鑾馳驛前往吉林查辦茲據查明覆奏此案伯都訥驢於光緒十四年秋收歉薄該驢鄉民呈報災狀已在十月將軍借撥公款俾助賑需且吉林因災觸緩賑濟各節業經先後陳奏六次伯都

訥鵬卽在其內並非諱災不奏該廳貸捐一項查係奏定儘收儘解自光緒九年以後由紳士代收代解帳目出入弊竇甚多于蔭霖所呈本屬包燈以餘款津貼書院各費並無其事學田一項當據于蔭霖家所設天德裕號經營顯有侵佔欺隱情弊于蔭霖所呈天德裕與書院另有交涉等語均係虛飾之詞抹兌憑帖一項貧民受累甚多于蔭霖家各館所出憑帖積弊尤甚上年四月該將軍諭禁後並不遵辦于蔭霖復有素服出入衙署條陳錢法假公濟私情事其運貨車輛輒用官銜旗號雖無漏稅確據殊屬不知遠嫌以上各節均經徵信提集卷宗人證確切查明已無遁飾于鍾霖既查有干預公事與民爭利情事業經革職應無庸議已革貢生蕭德馨中書銜符蘭芳貢生張朝翰舉人王文珊增生楊光黼附生于芳懷陳文俊附貢生楊振聲候選同知裴佩慈查與長順原參相符當經斥革亦毋庸議蕭德馨等挪用公款裴佩慈私借款項均著勒限完繳照例辦理前福建臺灣布政使于蔭霖兄弟親族干預公事罔利營私平日不能戒阻盪捐學田抹兌等事情弊顯然輒於奉斷懲辦之後捏辭申辯希圖朦混實屬咎無可辭于蔭霖著交部議處吉林將軍長順於飭查之件雖尙認真辦理惟於于蔭霖偶辦平糶貽害商民未能據實查奏意在聯絡官紳公事每多遷就亦有應得之咎著交部議處前署伯都訥廳同知保逢源雖無匿災情事惟於屬境歉收並不覆查詳報亦屬不合並著交部議處委員府經歷黃義查無句串朋

謀各情幕友秋桐朱均亦無擅用納賄惡惠串通證據均毋庸置議○壬寅諭軍機大臣等前據兵部奏
裴陸森楊昌溶由福建拜發摺件中途屢被拆毀當經諭令卞寶第等查辦茲據卞寶第奏稱卽經派委
委員逐站挨查閩浙兩省驛站均無拆毀情事請令沿途各督撫飭屬嚴查等語奏摺夾板屢有遺失斷
無各驛站全無拆換之理自應一體嚴查以期水落石出著李鴻章剛毅各飭所屬挨站確查究係何處
私拆卽行據實覆奏從嚴懲辦○諭徵麟奏熱河庫內遺失銀兩請飭訊究一摺庫存銀兩該官兵宜如
何小心看守乃竟失銀一千兩之多是外賊行竊抑係看守自盜亟應認真究辦德福一面飭屬一體
嚴拿竊賊一面飭令承德府知府將看守官兵嚴行審訊務須水落石出毋稍含混縣丞毓吉等未能先
事預防均著交內務府議處徵麟失於覺察亦難辭咎著一併察議○諭本日御史文郁呈遞封奏摺內
將知縣書寫縣主字樣殊屬非是著交部議處○癸卯長順奏前因雙城堡油商將自造油斤發往他處
取名自發載專爲興販油斤影射朦混既不就地納稅又多繞越漏稅經前將軍希元於光緒十二年十
二月間奏准在長春屬界朱家城子半截塔二處設立分卡二所稽查出境油斤貨物未稅者照章完納
已稅者驗票放行歷經照辦在案茲查自光緒十三年設立該二卡至今所收稅錢不敷經費當飭據雙
城堡協領覆稱年景歉收油糧少出使然不但自虧載油數無多卽商販就地完稅者亦少若不早爲整

頓慮致虧額等情據此奴才伏查朱家城子半截塔二處所設稅卡雖在各城衝要之途然以區區二卡稽察數百里出境之行商欲其貨無繞越稅無偷漏勢必不能且與其設卡截徵反滋虧累曷若就地納課較爲簡省擬請將朱家城子半截塔二處稅卡一併裁撤嗣後各外城所產油斤無論商販自發均令其就地納課歸於土稅額內照章徵收以節虛糜而重庫款下戶部議奏○乙巳諭直隸正定鎮總兵徐邦道呈遞到任謝恩摺內於擢尾年月上蓋用總兵關防殊屬不合著交部議處○諭禮部尚書崑岡刑部尚書肅申刑部左侍郎薛允升均著加恩在紫禁城內騎馬○丁未諭兩江總督著劉坤一補授未到任以前著沈秉成署理○戊申張曜奏臣承准軍機大臣字寄光緒十六年四月二十六日奉 上諭都察院奏山東紳士揀選知縣傳政源等以鹽歸官辦流弊滋深等詞赴該衙門呈訴等因欽遵臣即督飭濟運兩司確查辦理去後茲據布政使福潤鹽運使豐仲泰查明核議具詳前來臣查沂水縣鹽務先於道光二十九年 欽差查辦內因商人引積課懸奏請改歸官辦額設鹽巡五十名專司巡緝島匪歷年以來並無在該管上司衙門控告擾害之案訪查該縣現用巡役亦無三四百名之多惟該鹽巡等皆係悍勇之夫全在地方官隨時嚴束若稍寬縱卽難免藉勢陵人則是巡役之馴擾本視官爲轉移原未可執一而論臣深知其弊久經密訪嚴查申明厲禁不准擾害閭閻卽如上年范縣知縣白桂森寬縱

業經臣奏參革職在案誠以鹽務上關國課官商引地均賴巡役緝私而其中良莠不齊惟有犯必懲庶可收効而祛弊至傳政源等請將沂水鹽課改歸地糧一併徵納一節查東綱鹽務有引地票地之分票地中又有官辦商行民運民銷之別惟登萊青三府所屬安邱等十八州縣蓋因地近灘場鹽價甚賤故將課款歸入地丁徵收聽民自運自銷其沂水縣額崇四千張例建游灘官臺二場之鹽沂水以西各州縣皆運承阜場之鹽均係奏定章程不容紊亂如將沂水一縣改爲民運民銷地居腹地必致易販橫行無從攔堵鄰封十餘州縣將爲私鹽所灌鹽商既坐受其困鹽務亦立見其疲臣與藩運兩司再四籌維沂水鹽務惟有招令殷實商人先行試辦凡領票納課悉循舊章僱用鹽巡按照定額擇用土著之民嚴加約束不准絲毫擾民惟沂水鹽務自歸地方兼辦已四十年今驟令商辦誠恐在官人役頓失衣食之資不免暗中阻撓應遴委委員前往彈壓主持其間庶商人不致瞻顧爲難臣仍當督同鹽運使隨時察看總冀鹽課地方兩有裨益下戶部議奏○張曜奏光緒八年閏前撫臣任道鎔奏准在於撫標並交曹鎮標各營抽調步兵一千二百人分作三營設立營哨各官分別酌加津貼認真訓練所需餉銀卽在裁兵節餉項下核實動支一切營制餉數亦於八年十一年兩次奏經戶兵二部核定擬准先後咨行遵照在案嗣因東省工賑繁興庫款奇絀日久尙未舉辦惟近平勇營迭次裁撤綠營兵丁自應及時先行抽

練一營以爲之倡俟有成效再陸續添練以符奏案今在於臣標左右兩營挑選精壯步兵一百名曹標各營挑選精壯步兵三百名共合四百人爲一營配齊軍裝卽咨曹州鎮總兵王連三統帶已於本年七月初一日成軍駐紮曹州地方認真訓練期成勁旅至原奏每營應設大旗十名字誠二名經部臣兩次議駁毋庸添設現均作爲親兵以符每營四百人之數下部知之○庚戌兩江總督曾國荃卒江甯布政使瑞璋代遞遺摺欽奉 上諭兩江總督曾國荃秉性沈毅洵事公忠韜略宏深經猷遠大咸豐年間由優貢生從戎在江西北等省疊殲巨寇克復安慶之役出奇制勝懋建殊勳蒙 文宗顯皇帝特達之知不次超擢同治年間 簡任浙江巡撫仍帶兵剿賊激勵將士掃蕩無前直達江甯雨花臺苦戰兩年之久卒能攻拔堅城擒渠掃穴粵匪之平厥功最偉 穆宗毅皇帝特沛殊施賞加太子少保銜錫封一等伯爵戴雙眼花翎朕御極後優加倚任迭畀封圻均能盡職其在山西巡撫任內救災恤民政績尤著光緒九年來京召對命署禮部尙書旋卽簡授兩江總督到任後整頓地方營伍撫綏鎮撫卓著聲威上年 歸政慶典我 皇太后追念前勞賞加太子太保銜該督感激圖奮雖傷病時發猶復力疾辦公並未請假忠誠篤實爲國家柱石之臣方冀克享遐齡長承恩眷遽聞溘逝震悼良深曾國荃著追贈太傅照總督例賜卹賞銀三千兩治喪由江甯藩庫給發賜祭一壇派護理江甯將軍副都統承綬前往

致祭加恩予諡忠襄入祀京師昭宗祠賢良祠並於湖南原籍江甯省城建立專祠此外立功省分准其一體建祠其生平政績事實宣付史館任內一切處分悉予開復應得卹典該衙門查例具奏題本回籍時著沿途地方官妥爲照料伊孫特用主事曾廣漢卽著承襲一等伯爵毋庸帶領引見附生曾廣江著賞給舉人准其一體會試監生曾廣河著賞給員外郎分部學習行走伊曾孫曾兆龍曾兆祥曾蔭椿均著俟及歲時由吏部帶領引見候旨施恩用示眷念勳臣至意○王文韶譚鈞培奏查滇省電綫與川黔兩廣接通後擬自騰越屬至雲南省城添接一綫以通西南邊報經前督臣岑毓英會同臣鈞培暨前兩廣督臣張之洞奏奉 諭旨允准所有騰越工次出力各員並經臣鈞培於兼署督篆任內咨部立案茲據督後局司道湯聘珍等以工程告竣核明開單詳請奏獎前來臣等查此次飭委前廣西補用知州李必昌展設騰越電綫督前洋匠占臣出省勘路會同雲南候補知府凌應梧督同分催辦本各員及沿途地方官採辦電木並由川工餘存電料提濟騰工派員由上海運至四川瀘州札派邊屬同知李應棠留滇差委分省補用直隸州知州周政等赴川迎提應轉運驅延飭李必昌與前廣東知縣湯炳璣派員赴威寧一帶將電料各項迎送進省分屯楚雄大理永昌直達騰越於光緒十四年二月勘路採辦電木起至十五年正月二十四日開工旋於五月初一日工竣計自省至騰越驛路一千六百餘里所經多崇崖

盤嶂古箐深林往往百十里並無居民日則冒暑趕工焦渴欲絕夜則攢棚露宿狼虎時驚所渡瀾滄江
潞江龍江皆屬瘴癘繁興之地潞江一處尤爲險惡考之史乘卽漢臣諸葛亮五月渡瀘處江流惡濁波
濤洶湧人馬沾之足纔常多潰爛在事員弁衝冒瘴氣以網縋結筏截流橫渡幾費經營始達彼岸而時
當夏令風氣正深渡江三日內瘴故至十餘名之多此次展綫較之上屆創辦艱險實爲過之核與接遞
緊急軍報准照異常勞績請獎之案相符謹擇尤爲出力文武員弁繕具清單恭呈 御覽合無仰懇
天恩俯准查照粵東成案分別獎敘以昭激勸出自 迥格鴻慈特 旨如所請行○辛亥諭本年近畿
一帶水災甚重屢經賞給銀米賑撫惟念順天所屬十九州縣飢民衆多現屆嚴寒待哺嗷嗷情殊
可憫加恩著再賞給京倉漕米三萬石以備冬賑之用卽著藩臬等分撥各廠煮粥散放以惠災
黎○諭吏部兵部奏遵議處分各一摺前福建臺灣布政使于蔭霖著照部議卽行革職吉林將軍順
前署伯訥麟同知孫逢源均著降一級留任不准抵銷○壬子諭李鴻章奏藩司因病呈請開缺一摺副
德標著准其開缺廣東布政使著成允補授○癸丑諭直隸監生桑冲漢等請於十二連橋進南之七里
莊開挖七里由古河使水從三灘里出口入東淀自大清河以迄海等語著李鴻章體察情形所稱開河
洩水各節是否可行據實覆奏○以陳寶箴爲湖北按察使○卞寶第奏自本年春間鋼甲告成經北洋

大臣驗收後專為粵省協造廣乙廣丙兩船廣乙本月內即可試輪廣丙大件輪機近亦將次完竣現在輪機拉鐵鐵釘各大廠工程極鬆厚辛良匠若令其雜作細工未免有虛糜之費臣查協粵各船中有廣丁一艘於光緒十五年十月間亦已安上龍骨經前大臣裴蔭森奏報在案嗣准兩廣督臣李瀚章咨請暫行緩辦前來故將該船停止製造惟核計該船已動工程約有一萬三千餘工購備料件亦已過三分之一與其半途而廢不若竟其未完之工就其已有之料接續兼管俾廠工有日起之功而匠丁無星散之慮臣因粵省既議緩辦閩省又在需船故應趁工程稍鬆之時將該船作為本廠自造之船改名福靖以為國防之用如果以後粵省仍照原議辦理臣廠再當為之購件另製則一轉移間粵料既不至於滯留廠工尤不至於懸贖至該船製成之日其養船經費當由福州營後局設法籌備或卽就伏波琛航兩船挑舊換新酌辦辦理總期一船得一船之實用無廢船亦無糜費以仰副我皇上撙節度支講求防務之至意得 旨該衙門知道○甲寅賞給京帥八旗綠步各營官兵半月錢糧○賞給閒散宗室覺羅人等一月錢糧加徵宗室覺羅孤寡半月錢糧○乙卯以鳳鳴為理藩院左侍郎○己未諭京察記名人員將次簡放完竣著內閣部院各衙門於京察一等未經記名各員內遴選才具優長者出具切實考語保送吏部帶領引見○諭興廉游百川奏全漕告竣請將出力員弁獎勵及改獎人員各摺片本年江蘇

等省海運河運漕白糧米豆石先後抵通經興廉等督率坐糧廳等驗收完竣辦理均無貽誤興廉游百川著交部議敘所保出力及改獎人員各摺片著該部議奏○庚申以楊岐珍爲浙江海門鎮總兵陳永春爲浙江定海鎮總兵○以張國正爲福建按察使陳湜爲江蘇按察使○辛酉廖壽豐奏臣接准河臣許振禕咨光緒十六年六月十三日奉 上諭給事中張廷燦奏河南河工積弊亟宜革除並陳管見一摺河工積習甚深亟宜認真整頓著將一切剋扣偷減等弊嚴行查革妥議具奏另片奏沁河水勢湍悍請於金鄉地方建閘宣洩使由丹河分入衛水沁工款項徑交兩縣督飭公正紳士分段舉辦併著體察情形一併妥議具奏等因欽此欽遵移咨臣會同查辦除河工積弊由河臣查辦具奏外臣查沁河發源山西由濟源縣入境歷河內武陟兩縣合大丹河之水匯入黃河該兩縣地勢較低河身太窄每遇伏秋大汛險工疊生惟藉堤岸支持河內縣南岸計長七十六里北岸七十八里武陟縣南岸計長六十餘里北岸七十餘里兩屬民捐民修實歸兩縣代爲承辦光緒九年奏明改爲官督紳辦每年由司庫各發歲修銀一萬二千兩彼時未及更定章程仍係官爲經理冗費過多官亦不能常駐河干公事既多假手上下隔閡各不相聞連年生險轉失初意非去浮核實認真整頓實成紳士專辦勢將流弊日滋難期經久當經會商河臣檄飭候補道陸襄銳前往沁河上下游周歷履勘督同懷慶府知府李芳柳河內縣知縣

高郵海武陟縣知縣賈聯堂傳集紳士公議兩縣各設總辦沁工公所一處遴選家道殷實素稱辦事公正之候選教諭李伯恭教諭王略等每縣四人派充首事總辦工務至沿河分段舉辦卽飭該總紳公舉濱河附近耐勞習事之人各分段設立分防公所河內縣共計工分八段武陟縣共計工分七段認真修守保衛堤防其歲修領款一萬二千兩每年十月先發五千兩採辦磚石正雜等料預爲儲備次年正二月間發銀四千兩以備春鑲築堤並添購物料僱募夫工餘銀三千兩四五月間撥發以備伏秋防汛等用均由該總紳具領責成辦理所有從前辦公幕友外工書役並一切浮費悉行革除並經道員陸襄絨傳見該紳士等告以查辦情形傳宣 朝廷德意爲保護地方冀免河患起見各該紳莫不欣然感奮願從承辦此河內武陟兩縣沁工現擬釐定章程責成官紳遵辦之情形也至金鄉建閘使丹河分入衛水一節查丹河發源山西至河內縣之丹谷口入境分支爲二南流者爲大丹河東流者爲小丹河一綫細流由石斗門歷金城村至薛村出境迤邐入衛大丹河水勢較旺自九道堰以下支汊港渠二十餘道灌漑民田一千五百頃有奇金鄉卽金城村在小丹河下游與大丹河中隔二十餘里使併東之入衛勢難節節建閘山水陡發必致橫溢氾濫恐附近數十村頓失灌田之利且查勘衛水下游地勢過低河身更窄又有洪湯匠潭水匯入連年漫溢爲害勢難再容大小丹河兩水併流轉滋民患既據查明望擬辦

行應請毋庸更議臣伏思沁河雖僻在一隅而水勢浩濤修防之事無異黃河現釐定章程兩縣兼督率之權各紳有承辦之責不任善差則官民無慮陽閭盡革浮費則庫帑可免虛糜擬厥情形可期核實惟歲修款項本係兩縣赴司徑領不由道轉而造冊報銷仍須由道核辦書吏不免藉口現經定章發交紳董具領一切支用均歸紳辦不假書吏之手有餘留作次年備用不足設法籌墊酌盈劑虛定為歲額無所增減應請免其造冊報銷使紳民得以仰體 皇仁實心經理以資鞏固而垂久遠此次定章之後該地方官等如果辦有成效擬請仿照河工霜清保案酌予獎敘倘坑忽從事貽誤要工即行嚴參懲辦得旨如所議行○甲子德福奏本年直隸災區甚廣御史崇齡奏奉 上諭著直隸總督順天府尹嚴飭各屬停止燒鍋一年以平糧價等因欽此欽遵並經戶部行知當經轉飭欽遵在案茲據承德府知府啟紹稟稱查熱河所屬地方自入夏以來大雨時行出禾暢茂雖近河地畝間被衝刷不過十之一二統計收成約在七分以上伏思口外地方兵民食計攸關固應以粟穀為至要而其尤易豐收民不常食者惟黍梁雜豆苦收油麥等項每值秋稼登場全賴燒戶銷售而貧民用茲禁停燒亟宜謹遵辦理以濟貧民然口外殊與內地情形不同若不因地制宜則意在利民轉以病民若遽爾停燒糧價則必日減即令移粟於災區而道里既遙轉運維艱則災區無補救之益口外竟有穀賤傷農之勢況各屬開設燒鍋二

百餘家僱覓造酒之人名曰精骸均係外來無業游民每家少者十餘名多者三四十名統共約計不下六七千名此歷來已久燒鍋之實在情形遽爾停燒歇業一年恐因荒停閉若輩餬口無資必致流離失所爲匪爲盜其患不堪設想且採辦熱河並古北口兩處兵米歷久章程均係借資燒戶之力若遽爾停止不特燒戶坐失生計且恐顧家而失本並於地方一切情形諸多未便調查光緒三年直屬歉收曾經直隸督臣李鴻章奏請飭禁順直各屬燒鍋並未言及承德府各屬州縣亦正爲此也此次順直水災自應援照光緒三年直屬停燒未及口外事同一律可否仰懇 天恩俯准免其停燒以安地方如蒙 俞允燒鍋免停而酒利必厚擬令各燒戶量力捐輸多則捐銀五六十兩少則三四十兩一俟集有成數解歸順直災區助賑以資接濟如此辦理則災民可以濟急燒戶亦不致失業矣得 旨如所請行○乙丑許振禱奏 聖 猥以非才仰蒙 皇上天恩畀以董治黃運兩河鉅任營事以來日夕兢兢恪遵 聖訓仰託 福庇於黃河修守幸慶安瀾顯資賢駕馳於運河實未之及試不敢循例敷衍自取大戾茲復仰沐 聖主恩綸再三諭誡凡河工率作興事一切有所稟承目下已招夫六千名加治鄭功新堤各屬員放手招徠加購料將舊堤先行鑲補河防局委員先辦二萬金之碎石擬交來春即築壩鑲補百堵皆作此皆施治於未險爲河工爭此先著也 臣維河堤之弊如元氣久虧之人但有刻削日就衰頹不得不以

培補之藥術之臣此次定額六十萬兩其分入河防局十二萬兩者卽專爲培補而設計行之三年後日臻穩固自可年年節減若以後不能保固不能節減臣復何面目以對 皇上此時只有督率僚屬竭力盡心以冀稍紓 慈慮惟運河情形臣不能周知時查明訪究實有弊但比黃河較輕耳大抵因河臣不能常駐相隔數百里又各屬所轄堤工縣長千餘里又辦公之費每年山東司庫欠發萬金故因費絀而不懼河臣之督責但就所領者敷衍了事而已以致堤岸日壞河身日淤泉源已涸江南歲漕三十萬過此視爲畏途其每年濟運渡黃者皆幸賴夏月霖雨耳此而不力加整頓直將 天庾正供置之無人管理尙復成何事體查四營所部馬步兵尙有一千六百餘名雖口糧短絀一季然各營大勢如此養一兵必應得一兵之用大約無可如何臣校閱時設法彌縫去後復不實不盡亦積習使然皆堪髮指臣思之至再若不改革整頓剔除此弊則臣實爲欺飾之罪魁仰荷 天恩具有天良何敢出此然空語整頓究屬紙上虛談改必另派勤能廉介之員身任其事擬於濟甯督署設一營務處擇誠實可靠之文武員弁充之一面督辦堤工爲諸屬創使之款歸實用絲毫不能欺飾一面訓練兵勇月日有操使之兵卒有用餉項不致虛糜大致與臣設立河防局之辦法相同如此臣得居中布置雖隔數百里而堤工營務瞭若指掌不能欺矣此臣擬整頓運河堤工與河糧營務之拙見也抑臣更有請者凡營務當守近日新章無

論如何不足臣或出自捐廉或另籌補概不敢另有所請至於疏通運道加治堤工皆國家正大之務其工料人役工用第能核實並無捷法意欲查明昔年司撥定數籲乞皇上天恩敕下山東撫臣飭司照舊全給庶臣可以認真任事否則所短甚鉅臣雖竭盡愚衷究非空言能濟臣現定十一月初九日東裝前往山東一切情形容臣到後仔細查明斟酌妥辦再行陳奏下部知之

臣朱壽朋敬編

臣沈彭年恭校

十一月丁卯朔諭各國訂約以來雖普通問歲時不絕和好之誼歷久彌敦駐京各國使臣均能講信修睦聯絡邦交深堪嘉尚上年正二月間迭逢慶典欽奉 懿旨命總理各國事務衙門設宴款待賓海聯情洵稱盛舉茲朕親裁大政已閱二年在京各國使臣誼應親見允宜仿照同治十二年成案並增定歲見之期以昭優禮所有各國駐京實任署任各使臣著於明年正月由總理各國事務衙門奏請定期親見卽於次日在該衙門設宴款待嗣後每逢正月均照此舉行續到使臣按年親見至國有大慶中外臚歡並著該衙門屆時奏請筵宴用示朝廷修好睦鄰有加無已至意所有應行禮節著該衙門先期具奏○戊辰大學士潘祖蔭卒賜卹如例○以宛胸爲廣東瓊州鎮總兵○己巳以祁世長爲工部尚書孫家鼐爲左都御史○辛未以徐卨爲吏部右侍郎廖壽恆爲禮部左侍郎錢應溥爲禮部右侍郎○李鴻章奏前於光緒七年十月驗收碰快船摺內奏明奉天金州旅順口形勢實屬北洋險要局廠船塢各項當陸續籌款興造九年二月附片具陳籌辦旅順各工大概範圍聲明該處工程開山濬海工大費鉅仿照

西法多與洋人交涉絕無例案可循實難豫爲估定嗣於十四年十二月附片陳明旅順船塢工程交法國人德威尼承攬包做派按察使周馥候補道劉含芳督同妥辦並添築攔潮石壩暨籌撥工款數目均經蒙 恩允准在案本年秋間據報全工告竣當經遴派北洋海軍提督丁汝昌直隸按察使周馥津海關道劉汝翼會同前往逐細認真驗收茲據詳稱該提督等於九月二十三日齊抵旅順包工之德威尼因事回國有德威尼自覓監工洋人吉禮豐在工次開具洋文做工清單送由督辦旅順船塢工程候補道劉含芳譯成華文該提督等會同照單逐細量驗查大石船塢長四十一丈三尺寬十二丈四尺深三丈七尺九寸八分石階鐵梯滑道俱全隔口以鐵船橫攔爲門現在門水吸乾平連兵船已入塢修理全塢石工俱用山東大塊方石壘以西洋塞門德土凝結無縫平整堅實堪爲油修鐵甲戰艦之用又查隔外停艦大石澳東南北三面共長四百一十丈六尺八寸西面攔潮大石壩長九十三丈四尺形如方池岸淤蕩漾潮水落盡水深尙有二丈四尺西北留一口門以便兵船出入四週全砌寬大石岸由岸面平地量至澳底深三丈八尺二寸過岸泊船地無風浪搖動凡船入塢油底之後即可出塢靠岸鎮配修整做工極爲便利先是西面攔潮壩下歷年積淤有深至八九丈者各國洋監工往視均稱難以著手該洋人築造岸基時先砌鐵石圍牆下壓而於圍牆中空之處用繩汲取淤泥迫牆漸砌漸壓淤泥漸取漸出

露見堅結老土然後層築灰石上復接砌圍洞再上始砌石岸此澳岸三丈八尺以下之工做工之難做法之巧實所創見洋師經營之苦勞費之鉅亦以此段工程爲最又臨邊修船各廠九座佔地四萬八千五百方尺計鍋爐廠機器廠吸水鍋爐廠吸水機器廠木作廠銅匠廠鑄鐵廠打鐵廠電燈廠又澳之南岸建大庫四座臨東建大庫一座每座佔地四千八百七十八方尺備儲船械雜料以上廠庫各工概用鐵樑鐵瓦以避風雪而防火燭高寬堅固較瓦房更爲合用又澳臨之四週聯以鐵道九百七丈間段設大小起重鐵架五座專起重大物件以濟人力之所不及又澳臨與各廠庫碼頭等處置大小電燈四十六座以便燈工夜做之用又慮近海鹹水之不便食用也遠引山泉十餘里束以鐵管埋入地中穿溪越隴屈曲而達於澳臨之四旁使水陸將士機廠工匠便於朝夕取用不致因飲水不潔易生疫病又慮臨海遠灘之不便起卸也建丁字式大鐵碼頭一座使往來兵艦上煤運械不致停滯遇事赴機迅速其餘如修小輪船之小石臨藏舢板之鐵棚繫船浮標鐵橋以及各廠內一應修船機器均一一設置完備以上各項均與代德威尼監工之洋人吉禮豐開送洋文做工清單相符此次該提督等驗收德威尼包辦工程係於本年九月二十七日卽西歷一千八百九十年十一月初九日收工完竣自是日起限一年查照原議由代德威尼擔保之外國銀行照料一年限滿再行保固十年均與包工監工各洋人交代明白

此項工程原估銀一百二十五萬兩開辦之始由北洋經費內撥過銀七萬八千零八十兩仍需銀一百十七萬一千九百二十兩添做攔潮石壩等工須添籌銀十四萬三千五百兩二共需銀一百三十一萬五千四百二十兩奏准由直隸海防展捐項下撥銀六十三萬一千四百三十二兩八錢九分又由部庫及鄭工捐內撥銀五十三萬九千四百九十七兩一錢二分又撥給購買四快船餘銀六萬九千八百二十五兩九錢一分零又由北洋經費內續撥銀七萬四千六百六十四兩七分零以上先後共撥給銀一百三十九萬三千五百兩統作旅順陽澳廠庫各項工程之用內德威尼承辦鳴澳石泊岸等工用銀一百十五萬兩又添做攔潮石壩自來水管鐵棚涵洞小石船塢等工用銀二十萬八百五十兩又添購機器用銀四萬二千六百五十兩出入兩抵儘數開銷業經旅順工程局將歷次請領銀數與海防支應局逐款核對均屬相符應由海防支應局將收放此項工程各銀數開單詳請咨送海軍衙門戶部查核至所做各工均係洋人包辦前經臣奏明與內地做法迥異無例可循准工部咨覆有案應由旅順工員另開工程丈尺做法機器名色件數清單詳請分咨海軍衙門工部存案並據繪具船塢船澳廠庫各工圖說前來臣查旅順海口居秦直東三省洋面之間口內山圍沙互東西兩澳可泊兵船多隻三省海面設有戰事策應均極便捷洵爲北洋緊要門戶既有大枝海軍駐紮船塢一項實係必不可緩之工自奏明

籌辦以來已及十年祇因鉅款難集工程浩大其間又值海防有事未能一氣呵成幸賴海軍衙門暨戶部顧全大局撥款應手俾要工得以速成旅順口瀋陽大洋怒潮衝激風浪搜淘水底施工極難總辦聞在外洋經營水師海口臨澳各工需費動輒千百萬金與內江內河工程迥異德威尼全仿西法製造亦復幾經改作始底於成今據驗收各工均屬相符一年限內由代德威尼擔保之外國銀行照料並具保固以十年爲限嗣後北洋海軍戰艦遇有損壞均可就近入隔修理無庸借助日本香港諸有隔泊爲緩急可恃並無須糜費巨資從此量入爲出漸擴充將見北洋海軍規模足以雄視一切渤海門戶深固不搖其裨益於海防大局誠非淺鮮此項工程原與洋匠包辦全用洋法並無例案可循請免造冊報銷得旨該衙門知道○癸酉唐炯奏巧家威甯兩銅廠礦脈如常其餘各廠都陸續見效但入山不深礦脈尙微現嚴督趕辦十起頭批年內足可繳齊威甯鉛廠礦雖多成分尙薄於七月開鑛煎出鉛斤已陸續交貴州採辦京鉛委員鄧良成收解其礦山鉛廠已起解五十萬斤倘貴州工本發足年內尙可辦得數十萬斤下戶部知之○戶部左侍郎孫詒經奉賜卹如例○甲戌卞寶第奏前奉戶部奏定外省報銷新章第十四條內載各省設立機器局並閩省船政局如有添購機器經費若干事前奏明咨行立案事後方准核銷等因茲據廠員稟稱輪機廠汽機經用日久機括鬆動不靈應添製十五匹馬力汽

機一副以備抽換工料共銀一千四百餘兩又輪機水缸兩廠製造銅鐵小機件藉欲節省汽力輪機廠添製旋鐵小輪牀三副工料共銀一千五百餘兩水缸廠添製掛壁小鑽機二架工料共銀一百兩又船槽機器屋宇自光緒十年間大修之後歷用將及五年該槽爲任事之區日久不無鬆朽用特興修以昭慎重工料共銀二千一百餘兩又工次船臺歷時已久木質亦有朽蝕凡起製新船均應先行驗明其應修者卽與興修始堪任重計修第三號官甲艦船臺工料銀七百餘兩又建造馬限中坡後坡護廠礮臺兩座經前大臣裴蔭霖將建造緣由於光緒十三年三月間奏明在案工程現已告竣計中坡礮臺工料共銀八千七百餘兩後坡礮臺工料共銀一萬七百餘兩以上各款均應歸於光緒十五年分製船經費項下造銷等語呈請立案前來臣覆查無異除咨部查照並彙案造銷外謹恭摺具陳下部知之○乙亥以榮惠爲內閣學士○丙子李鴻章奏察哈爾都統管理口外臺站牧羣地廣任重原定廉俸等項本屬無多又經折扣歲入不及千金不敷辦公之用歷任皆不能延致幕友卽緊要案牘多委之左右司員遂致白弊叢積兼以轄境過廣須巡閱蒙古各旗稽考牧羣軍政輒因經費無出恐滋擾累積弊已久不易挽回其醫者僅守成法而不能有爲不肖者至漁陋規而莫解自潔牧政之壞至今日而極屢經言者多劾疊奉諭旨按治直隸與察哈爾接壤邊有宣化將吏來見臣隨時詢問知之頗詳去歲前後查獲之

案亦經條陳上聞 聖明博採羣言深知積弊 特擢湖北撫臣奎斌爲都統奎斌歷任封圻廉公自矢
勵節耐苦斷不肯以賠累爲言惟立法須經久可行中材能守際此得人整頓當使後來永遠遵循伏念
近年 朝廷整飭東三省軍事吏事奉天將軍府尹諸臣既增養廉復加公費爲數甚優吉林將軍瑤春
副都統等亦皆酌加公費 臣於光緒五年以順天府尹養廉過少奏請歲撥天津釐金三千兩以資辦公
並經奉 旨允行有案蓋 聖明體念臣工須令措置裕如乃可責其奏公剔弊若使遇事竭蹶則一切
要務皆難措手縱臣下尙知自愛而因循牽掣所失實多察哈爾都統經營臺站總理牧政綏輯蒙古寄
任重要而廉俸微薄用款不敷現當積弊之後剔釐片新亟應酌加津貼俾辦公有資得以實力整頓惟
部款既難籲請司庫亦無可籌查有該處茶馬釐捐一項除奏定常年應放各款外尙有盈餘過有要差
向准專案奏撥擬請在此款內每年勻提實銀三千六百兩以三千兩撥歸都統衙門作爲加增公費副
都統職司較簡亦擬酌加六百兩以示體恤於放款不致短絀於公事實有裨益且與順天府尹奏加公
費成案相符如蒙 恩准再由 臣咨行察哈爾都統查照下戶部議奏○丁丑大祀 天於 圓丘 上
親詣行禮○剛毅奏吳淞江爲江浙諸水入海之咽喉歲久失濬積淤日厚去秋霪潦成災下流洩水不
暢以致倒輪倒灌一片汪洋 臣等諸與圖詢諸衆論歛稱由於吳淞江迄未開濬之故前於挑挖蘊藻河

時聲明欲濬吳淞江必先濬蘆漢河支港一律疏通然後幹河可以大舉修治業經恭摺具奏在案現當冬令水涸之時農隙務閒晚稻均已收割正宜及時興工以收江浙兩省之水利經臣札委候補知府周運會同沿河地方官吏招集民夫分段挑濬並先經臣函商兩江督臣曾國荃札調蘇松鎮總兵張景春狼山鎮總兵曹德慶管帶營標親兵忠字營記名提督劉久有統帶營標親兵中營浙江候補道朱式雲記名提督蕭鎮江等分帶所部防營兵勇來工協挑又經臣派撥管帶撫標正前水陸等營記名總兵龍殿揚兼統中軍左營參將常福兼統正後營城守營參將曾毓衡副前營補用副將徐文慶等分率所部先後到工定於十八日各歸各段一律開挑值此天氣放晴一切工程自能速成設遇陰雨時作或不免多延月日此中所深慮者也查吳淞江工程袤延有七十餘里之長此番招募民夫調撥勇丁不下萬餘人雖民工勇工各分段落不使犬牙相錯致起紛爭猶恐查察稍有未周該印委及營官等未足以資彈壓擬由臣隨時轉奉派從親往工次督率指撥鎮撫一切合併聲明報聞○戊寅廖壽豐奏光緒十五年十一月河內縣王領莊沁河漫口合龍前撫臣倪文蔚請將在工出力人員援照前年武陟縣小楊莊成案擇尤酌保數員奉到 硃批著准其擇尤酌保數員毋許冒濫欽此欽遵於本年二月二十七日擬定請獎文職二十員開單具奏奉 硃批該部議奏單併發欽此嗣准吏部咨明沁河合龍出力人員請援

照武陟小楊莊成案請獎既未欽奉 特旨允准仍應按尋常勞績核議且前奉 諭旨准其酌保數員今請獎至二十員之多未免浮濫應令將所保員額核實刪減到部再行核議光緒十六年四月十四日具奏奉 旨依議欽此等因咨行前來前據 臣未及核辦接督到 臣伏查河南武陟兩縣所管沁河一切工程均與黃河相埒是以漫口則地方官得有處分合龍則出力人員得請優獎勸懲一秉至公所有河內縣王賀莊堵築沁堤一案時值秋雨連旬各該員分掌兩縣各處籌防修守並派赴各路採購料物風雨載道泥深沒踝自興工以至合龍備歷艱辛是與武陟小楊莊之役事同一律可否仰懇 天恩仍准援照小楊莊成案核獎之處出自逾格 鴻慈至原請擬獎二十員 臣逐細訪查悉心考核遵即切實刪減裁去五員僅存十五員另繕清單籲懇 恩施以昭激勸下吏部議奏○富勒銘額奏伊犁滿營官兵自兵燹後死亡相繼男婦丁口僅存一千三百有奇光緒八年原任將軍金順奏請由錫伯營挑選壯丁三千二百名作為新滿洲以補惠遠城滿營四千之額光緒十四年前將軍色楞額會奏擬請減為三千五百四員名嗣經部議核駁伊犁滿營光緒十三年據錫綸奏報僅存男婦一千三百有奇今該將軍請設官兵三千五百四員名計丁口三萬四千一百餘名是所設官兵浮於所存男婦之數幾十倍實未便率准支給俸餉等因伏查伊犁舊滿營現存丁口一千三百餘名金順奏請挑選錫伯新滿營九千五百

餘名合計新舊滿營丁口一萬有奇並無三萬四千一百餘名之多今部臣既經議駁自應遵照辦理惟滿營丁口僅存一千三百餘名十六年正月起又陸續收回丁口三百餘名以惠連一城准定兵額一千名不特勢顯空虛卽操防巡邊坐卡差遣等事已實難於分布勉強敷衍設有貽誤咎將誰歸雖撫臣劉錦棠會議奏請安設軍標馬步一千名除填紮防邊而外無餘兼顧前將軍色楞額曾與奴才籌商滿營官兵擬設二千於舊滿營人數內挑足一千名仍挑留錫伯新滿洲一千員名共二千名以資捍衛未及具奏因病出缺奴才渥荷 聖恩護理斯篆斷不敢畏難緘默稍涉因循現擬先將旗營力求整頓以期漸復舊制而滿營甚覺兵單萬難分布再四思維惟有籲懇 天恩准照色楞額原議滿營定爲二千兵額仍挑留錫伯新滿洲一千員名以備不足實於邊防大有裨益所需俸餉撥節勻放總不逾四十萬餉之數如蒙 俞允再將官兵銜名暨餉章等項造冊咨部查核其餘未盡事宜容俟查明再行具奏下部議奏○以廖壽恆爲戶部左侍郎錢應澍爲禮部左侍郎李文田爲禮部右侍郎○己卯怡親王載琰薨賞銀一千兩治喪○辛巳 麗皇貴太妃薨○壬午諭本月十五日 麗皇貴太妃薨逝十八日朕親詣奠酒行禮大內以下宗室以上並王公文武官員著於是日素服一日○李鴻章奏准軍收支款項業經截至光緒十四年十二月底止列爲第十七案報銷於光緒十五年十二月初三日具奏奉 硃批該部

議奏單併發欽此並經造冊送部接准部覆按冊核銷在案伏查淮軍分駐直隸沿海各口要區並奉天之旅順口大連灣等處計武衛親兵武毅仁盛銘補護軍親慶馬步水師共五十一營連同水陸各哨棚併護運餉械弁勇統歸淮軍案內造冊彙總請銷今自光緒十五年正月起截至是年十月底止列爲第十八案所有統領營哨官弁員名勇夫開收總數駐防處所先經造冊分咨軍機處暨戶兵工部備查又將支給正雜款項增裁數目遵照新章每三箇月開報一次咨送各部查核其淮軍馬步水師各營並隨營辦事支應等差文武官弁親兵勇夫薪費口糧例補馬匹柴薪車價駝騾餵養卹恤水陸轉運價腳夫工採辦製造用款油餼船隻經費正雜各項均循前案楚軍營制與奏定章程歷屆准銷例案分別釐清起止概按湘平折寶庫平接續造報飭據淮軍報銷局司道逐款清釐查核計籌管銀九十三萬三千一百七十八兩五錢有奇新收銀二百十二萬六千一百二十五兩一錢有奇登除及附銷銀四十五萬一千九百七十三兩一錢有奇開除正雜等項並照部議酌定軍需報銷章程各歸各部核銷計應歸戶部核銷銀一百八十三萬五千二兩六錢有奇應歸兵部核銷銀三萬九百四十九兩七錢有奇應歸工部核銷銀八萬五十三兩七錢有奇統共請銷銀一百九十四萬六千六兩一錢有奇應截存銀六十六萬一千三百二十四兩三錢有奇已接支光緒十六年正月以後淮軍馬步水師營哨正雜餉項並購製中

外軍火器械工價預儲軍米等項動放無存歸於後案請管項下滾接造報等情具詳請奏前來臣查淮軍各營分駐直隸天津大沽北塘蘆臺至山海關沿海一帶並奉天之旅順大連灣各海口修築新式礮臺擇要扼守仿照西洋兵法練習後膛鎗礮水雷魚雷各用法請求制勝機宜俾聲威既張敵情自懾實爲消患無形之計海疆千餘里逐漸布置內衛京畿門戶外控藩屬鄰邦有事得資應援尙稱緩急可恃餉項乃計口授食之需關繫至重歷屆報銷案內截存銀兩皆係設法節縮並將月餉酌量緩欠誠以近畿海防關繫重大無時敢忘戰備不得不稍留餘地藉應急需現計欠餉至一百六十一萬六千九百九十兩有奇若將截存銀兩儘數抵補不敷甚巨況次年各軍食米須先期發價赴南省購運方免臨時誤此項米價向在截存項下酌撥近因各省關額解准餉逐漸短少往往入不敷出竭蹶情形日甚一日本屆新收銀款較上屆計少至三十萬兩之多遂至截存銀兩動放無存惟有隨時請催各省關實力籌解冀免遇事束手所有造報十五年正雜款項均係循照歷屆准銷成案撥節支發實用實銷並無絲毫浮冒得旨該衙門知道○岐元劉秉璋奏本年春間雷波總屬小溝補卽夷支風箏漁姑等甸結西昌縣生番二千餘人滋擾邊境焚劫財擄人經臣等調派各營前往迭於牛喇水蓮花石等處接仗擊退會將獲勝緣由奏陳在案七月二十七日大院子員扎黑夷普子糾夷五百餘人竄出海瑞場徐家崖一帶

經哨官趙孟謙都司吳以忠合攻羅斃夷匪四十餘名趙孟謙奮勇直前將夷寨子生擒過陣餘眾奔潰
統領達字營馬朝選卽於次日率弁分路由徐家庵進剿曹家垣羅斃夷匪百餘名長勝右營弁勇擒獲
白夷數名各奪獲刀矛氍衫百餘件並燬蠻棚七十餘間各營日出搜山夜守要隘諒夷潛侵時擬均經
營勇擒斬多名隨時擊退馬朝選探得夷匪集有二千餘眾盤踞距三陵岡三十里之田家灣因密與各
營將備商定調守備戴炳勳千總徐鐵所部營勇並參將謝金詰之鄉導勇二百名及先鋒營劉玉田合
爲一隊進攻田家灣調出波臘施毓齡帶勇一百名團練二百名爲一隊進攻田家灣左路該統領自派
管帶唐珊峯並衛隊及中哨隊伍爲一隊進攻田家灣右路復派長勝右營姚振邦安阜營吳以忠先期
潛赴三複岡於九月初七日夜陸續會齊三路同時並進夷匪驚覺大股出敵我軍各用洋鎗連環圍打
一面放火先將寨外蠻棚焚燬鄉導先鋒等營先進各營相繼而進接戰良久夷眾抵敵不住四散奔逃
墜巖落澗者無算乘勝將田家灣蔡家梁子夷寨數百間悉行焚燬天曙追殺十餘里盡砍致斃夷匪百
餘名斬首二十餘顆生擒黑白夷三十餘名是役也我軍帶傷亦二十餘名當卽照章分別輕重給賞隨
密探該敗夷散踞葱子坪雙土地白巖灣等處夷寨馬朝選與各營將備商定進攻於初九夜仍分三隊
謝金詰劉玉田督勇銜枚疾走至老街子解衣渡河直上該坪陣斬十餘名生擒督隊夷酋百戶達曲一

名黑白夷二十餘名施毓齡等進攻雙土地姚振邦等進攻白巖灣同時撲擊各有斬獲羅路逆夷無算
餘眾退敗三路弁勇會齊於初十日午後收隊沿途共燬夷巢千餘間夷卡三十餘座各營歡俘獻誠當
經該統領分別記賞一面將擒獲白戶達曲等斬馘叛夷退入毋豬坡監守劉玉田探得有黑夷慈鳴者
爲此次號召夷匪指揮出擾之人遂與謝金詰審派熟識慈鳴之鄉導勇於十五日夜潛赴該坡夷匪偵
知山頂搖石如雨而下待至四更搖石不繼我軍突上山寨火彈齊發火光中鄉導勇羅廷基瞥見逆首
慈鳴倉皇衝突鏖戰兩時傷其左腿始就擒獲夷眾又復散敗我軍振旅而還等因其先後告捷檄令
各營仍前嚴密防範相機進剿俾該夷勢窮力竭自必傾心歸誠得 旨著俟事定後擇尤保獎毋許冒
濫○乙酉 上幸醇親王邸第視疾○丁亥醇親王奕譞薨○諭朕欽奉 慈禧端佑康頤昭豫莊誠壽
恭欽獻皇太后懿旨皇帝本生父醇親王奕譞秉性忠純宅心仁厚才猷遠大勳業崇闋自幼仰蒙 宣
宗成皇帝鍾愛恩眷優加 文宗顯皇帝誼篤友于封爲郡王同治年間晉封親王歷充御前大臣等差
恪恭盡職迨皇帝入承大統特降懿旨令以親王世襲罔替懋諭再三涕泣受命歷年以來平章軍國重
事主持正議利國利民其總理神機營及創立北洋海軍宏謨碩畫成效昭然前年親赴海口巡閱操防
尤能綜攬大綱不辭勞瘁論國家酬庸之典雖疊頒異數猶覺功浮於賞而王謙謹爲懷益加寅畏於特

旨贊坐杏黃轎始終不敢乘坐並以現居 賜邸爲皇帝發祥之所敬援 雍和宮成憲請旨恭繳其忠
敬篤契之忱數十年如一日自古賢王罕有倫比王氣體素強前歲感犯肝疾特率同皇帝屢往問視旋
卽調治熱瘥本年夏間感受暑溼觸發痼疾復同皇帝迭次詣邸看視近日以來聞王病篤深宮默念日
夕焦然不料病勢已深醫藥罔效遽於二十一日丑刻薨逝深宮悼實深鑒賞給陀羅經被卽日親臨
賜奠皇帝詣邸成服行禮派總管內務府大臣福錕禮部尙書崑岡工部尙書熙敬禮部左侍郎鍾應博
辦理喪事所有一切事宜俱由官爲經理鎮國公載灃卽日承襲王爵用示篤念親賢至意○諭朕欽奉
慈禧端佑康頤昭豫莊誠壽恭欽獻皇太后懿旨自古帝王以孝治天下必推本於所生而禮有經權
尤必折衷至當方足以昭示來茲恭讀 高宗純皇帝御製漢議辨援引禮經垂爲定論稱所生曰皇帝
本生父歿則稱本生考立廟於其邸第爲不祧之廟祀以天子之禮合乎父爲士子爲大夫葬以士祭以
大夫之議則尊親之誼交盡而於公義私恩兩無遺憾 聖訓煌煌昭垂萬世洵協於天理人情之至皇
帝入嗣 文宗顯皇帝誕承大統光緒元年正月醇親王奕譞密陳豫杜妄論一疏內稱歷代繼統之君
推崇本生父母者以宋孝宗不改子偶秀王之封爲至當將來如有以治平嘉靖之說進者務目之爲奸
邪小人立加屏斥等語持論正大光明敬徵 高宗純皇帝御諭正相脗合其志慮之忠誠防維之深切

方之古純臣何以加茲上年二月初二日因吳大澂之奏特降懿旨將王之密疏宣示中外俾天下臣民咸知我朝隆軌超軼前代而醇親王寅畏之本心從此昭然若揭詎意天不假年遽然長逝痛惜之極悲感彌深醇親王著定稱號曰皇帝本生考所有一切飾終葬祭典禮自宜恪遵 祖訓詳定報章用遂皇帝恩義交盡之忱兼表賢王終始不渝之志著派御前大臣軍機大臣翁同龢孫家鼐會同禮部妥議以聞○戊子劉秉璋奏查川江險灘櫛比不可枚舉其最奇險者爲三峽夔峽起峯節至瞿山爲三峽之首卽古瞿塘峽當峽口者曰艤瀨堆冬則出水二十餘丈夏則沒入水中水高漲亦二三十丈勢險溜急人力難施巫峽在巫山縣東水經註云是杜宇開鑿以通江水沿峽一百六十里峯巒峭削所謂巫山十二峯也在湖北宜昌歸州境者曰巴峽卽古之西陵峽凡此三峽峭壁插天懸崖千仞並無山徑可通蜀道之難於斯爲最中惟一綫川江急湍奔流上下行船絕無餘路每當夏季水漲舟行輒覺驚險者不下數百十人光緒十四年九月間夔州府汪鑑立志捐廉稟請開修經臣批准先從夔峽開工自白帝城起下至大溪對面之狀元堆止曲折紆迴約三十里施工之始工匠無所憑藉乃對壁鑿孔層累而上每開一大竇實以火藥燃引纜而炸之旋炸旋鑿使千仞峭壁之層嵌成五六尺寬平坦路緣轍可以並行其中分造滑溜平橋十九道自狀元堆至巫山縣城九十里中造平橋二道拱橋四道並創開土石山麓亦成

寬平坦路鑿峽於去夏工竣迄今兩年當盛漲封峽之時行人往來山路肩挑背負絡繹稱便而舟行有
絳路亦少淤溺之虞巫峽於十五年十月開工自巫山對岸起下至川楚交界之偏魚溪青蓮溪止計七
十五里地段較長經費較鉅計造大拱橋四道連開鑿變險巖爲康莊今已一律告成本擬接修楚境
巴峽惟力是視經臣電商湖北督撫臣接其回電由楚籌修是以修竟川界而止是役也該府汪鑑捐銀
一萬兩臣籌撥捐款銀二萬八千餘兩渝慶兩屬官商樂捐銀二萬二千餘兩又錢二萬餘串除支用一
切經費及設石橋鐵練等用外存銀六萬兩發商生息以作兩峽絳路輪路橋道歲修之資茲據該府汪
鑑造冊稟請立案前來臣伏查蜀山萬點赴眾舉者慶門川水支流障奔濤者巫嶺徑路既絕攀躋難登
舟遭覆沒之傷人鮮救援之術數千年來未能經營開鑿者誠以工艱而費鉅也該府汪鑑有志竟成竭
一己之誠勝五丁之力免行人於胥溺慶王道之湯平厥功實非淺鮮其平日居官亦復精勤廉潔培
植士林合無仰懇 天恩准將慶州府知府汪鑑降 旨嘉獎以爲好善勸民者勸出自 聖裁得 旨
覽奏已悉汪鑑好善勸民著劉秉璋傳旨嘉獎該部知道○己丑諭朕欽奉 慈禧端佑康頤昭豫莊誠
壽恭欽獻皇太后懿旨皇帝本生考醇親王薨逝業經降旨加恩用昭隆禮因念飾終之典首重易名醇
親王親賢重望中外交孚茂績宏猷增光史冊允宜特加謚號昭示來茲醇親王著賜謚曰賢以彰勳德

而垂久遠○多羅克勤郡王晉祺等奏光緒十六年十一月二十一日內閣奉 上諭朕欽奉 慈禧端佑康頤昭豫莊誠壽恭欽獻皇太后懿旨等因欽此欽遵鈔出前來臣等伏查禮經齊衰杖期章為人後者爲其父母服又通禮內載齊衰不杖期爲人後者爲本生父母是爲本生父母應服齊衰期也今醇親王薨逝恭奉 懿旨命臣等將一切飾終祭典禮會同妥議臣等公同商榷謹遵 懿旨醇親王薨定稱號曰皇帝本生考之義擬請 皇上持服期年服制既定一切典禮擬即准此次第詳定臣等悉心參酌謹將飾終各典禮分列條款開單進呈伏候 皇上恭請 懿旨遵行一臣等謹案期年之服十二月而除今准十二月之例擬請 皇上御縞素或十三日或十一日恭候 懿旨一擬請 皇上於釋縞素後請髮一親王薨逝照例奏請輟朝三日今醇親王薨逝應否酌加日期之處恭候 懿旨一期年內擬請 皇上除詣 皇太后前詣 安鑒 聽政 召見外 御便殿時仍用素服一縞素期內每日奠酒擬請 皇上詣邸第親行奠酒外其餘每次奠酒擬請 欽派王貝勒公每日一人前往恭代其齊集禮節應由禮部照例辦理一期年內 壇廟大祀擬請 皇上親詣行禮其中祀期年內均遣官行禮一期年內遇元旦 堂子行禮擬請 皇上仍御禮服一期年內遇元旦 皇上親詣 慈寧宮行禮御禮服作樂其 太和殿朝賀仍御禮服升殿宣表應否作樂之處恭候 懿旨一初祭大祭及奉移奉安一應

祭奠需用羊酒饌筵楮錢金銀錠等項應由禮部查照親王例辦理一祭文內擬請用 皇帝敢昭告於
本生考醇親王碑文稱謂同應否恭書 御名臣等未敢擅擬恭候 慈旨其一切章奏內恭遇 醇
親王字樣均用雙擡書寫 上諭朕欽奉 慈禧端佑康頤昭豫莊誠壽恭欽獻皇太后慈旨本日御前
大臣軍機大臣翁同龢孫家鼐會同禮部奏遵議醇親王飾終典禮分列條款請旨遵行一摺皇帝服制
卽著定爲持服期年御稿素十一日輟朝十一日期年內除請安及聽政召見外御便殿時用素服 壇
廟大祀皇帝親詣行禮中祀均遣官恭代元旦御堂子行禮仍御禮服詣慈寧宮行禮御禮服作樂其太
和殿朝賀御禮服升殿不宜表樂設而不作蒙古朝正來京王公例賜筵宴照舊舉行宗親廷臣筵宴均
著停止其祭文碑文均書皇帝名嗣後臣工奏疏凡遇醇親王字樣均用雙擡書寫餘著照所議行該衙
門知道○庚寅諭內閣朕欽奉 慈禧端佑康頤昭豫莊誠壽恭欽獻皇太后慈旨十二月初七初九十
八等日中正殿拈香著派禮親王世鐸恭代行禮其坤寧宮祭神照常舉行明年六月皇帝萬壽照常行
禮樂設而不作停止聽戲○辛卯以賈起勝爲湖南永州鎮總兵○癸巳諭朕欽奉 慈禧端佑康頤昭
豫莊誠壽恭欽獻皇太后慈旨醇親王載灃著加恩賞食親王全俸入八分輔國公載洵著晉封爲入八
分鎮國公鎮國將軍載瀾著晉封爲不入八分輔國公○諭朕欽奉 慈禧端佑康頤昭豫莊誠壽恭欽

獻皇太后懿旨醇親王福晉著加恩賞食親王全俸○多維克勤郡王晉祺等奏恭查節終典禮內曰初祭曰大祭曰奉移均應次第舉行現准內務府文稱據欽天監選擇得十二月初十初祭十六日大祭二十日奉移 閣寓暫安臣等公同商酌分列條款開單進呈伏候 皇上恭請 懿旨遵行一初祭大祭日均擬請 皇上親詣行禮御青長袍褂冠摘纓一祭文內恭書 御名擬請 飭交內閣敬謹書寫一初祭大祭日燎鑪前奠酒擬請由原派每日奠酒之員勅貝子公內 欽派一員奠酒一初祭大祭 皇上親詣行禮禮節應由禮部前期酌擬恭進一奉移前期一日應否 親詣行禮照大祭禮讀文致祭恭請 懿旨一奉移日擬請 皇上詣邸第步送至大門外 乘輿由間道先行應恭送至何處恭請 懿旨一奉移 閣寓暫安後 皇上於何日親詣奠酒恭請 懿旨一奉移日應用儀衛及大槓樓夫均由內務府奏明辦理一奉移 閣寓以後一應祭葬均請由內務府奏明辦理 上諭朕欽奉 慈禧端佑康頤昭豫莊誠壽恭欽獻皇太后懿旨本日御前大臣軍機大臣翁同龢孫家鼐會同禮部奏酌擬醇賢親王初祭大祭奉移各典禮開單進呈請旨遵行一摺所有十二月初十日行初祭禮十六日行大祭禮二十日奉移 閣寓皇帝均親詣行禮御青長袍褂冠摘纓奉移前期一日皇帝親詣行禮照大祭禮讀祭文奉移日皇帝詣邸第恭送至適園候過退宮二十一日仍詣 閣寓奠酒行禮餘均照所請行該衙門知

道

十二月己亥上詣 大高殿祈雪○諭軍機大臣等李鴻章電報已悉即著該大臣電致各該督撫俟俄太子抵口岸時一律照議親行款待以重邦交○乙巳 上幸 醇賢親王邸第行初祭禮○升泰奏奴才前在印洋承准總理各國事務衙門電開界約已定該大臣應即遵 旨回藏游牧三端照約派員辦理遵 旨電達等因欽遵在案奴才遵即由嶺回邊赴巡後藏事畢即行回藏數月以來守候 批約迄未奉到而藏番愚蒙者衆每多意外之疑復經派員再四開道近始別無他議惟求以後通商每年定以數月不必終年交易奴才仍批飭俟舉辦時由委員會同洋員妥議票候飭遵未允所請茲於光緒十六年十月初九日准赫政來函轉准孟加臘巡撫白體大稱中英於西歷八月互換約據已三月有餘應請駐藏大臣派員會辦新約三條等由奴才查通商游牧三端其中頭緒紛繁非深知藏印情形者辦理必至失當前隨奴才赴印立約之邊務委員稽志文已蒙 聖恩特賞知府應即送部引 見第新約三端另行派員恐辦理未能合宜轉覺費事惟有仍飭該員往辦以資熟手但一經接辦三款即一時不能遽離合無仰懇 天恩俯念邊務緊要准將不論繁簡四川儘先即補知府稽志文俟補缺後再行送部引見由部知照川省出自逾格 鴻慈得 旨如所請行○丁未戶部奏查 臣部辦理交代參追之案如

實係家產盡絕無力完繳者除豁免本員家屬外向有責成上司分賠之例嗣因各省日久生懈臣部復於光緒十三年五月間議覆御史胡俊章請定交代章程摺內聲明舊例著落認真分賠在案上年三月十六日恭逢 恩詔內開凡應追贓私實係家產盡絕者概與豁免旋經臣部奏設豁免處推廣條款釐定章程通行遵照於是臣部辦理豁免案件遂有常例 恩詔之分常例所應豁免者歸各省司承辦常例所不應豁免必須援引 恩詔而後准豁免者歸豁免處承辦豁免之數原所以推廣 皇仁故一經准豁免即行銷案不復著落上司分賠誠以既 加恩於本員即未便責償於上司也至常例豁免分賠之案例無遇有 恩詔作何辦理明文惟以理論之同一應豁免之案由豁免處承辦者奏准後即行銷案由各省司承辦者題准後仍復分賠辦法殊未盡一況常例豁免皆屬情節較輕之案各省因例本應豁免未援引 恩詔今乃以未援引 恩詔之故辦理轉致從嚴尤不足以昭平允竊維分賠舊例各省久未遵行自光緒十三年部議申明始行舉辦未及四載即逢 恩詔應賠之案尙屬無多臣等仰體 朝廷寬大之心自當劃清界限分別辦理擬請將常例豁免之案核其參追奉 旨日期如在光緒十五年三月十六日 恩詔以前者一經題豁即行銷案無庸著落上司分賠即業經行令分賠者亦准予註銷完案如在光緒十五年三月十六日以後者仍照舊例若本員家屬勒追無著即著落上司分賠以重庫款似此釐

爲變通庶部章不致兩歧而 隆恩亦微普被矣如蒙 俞允卽由臣部通行各省欽遵辦理得 旨如
所議行○戊申以解濟甘肅新餉予布政使黃彭年等獎摺有差○己酉 上復詣 大高殿祈雪○李
鴻章奏三品銜吉林補用道李金鏞經 旨 奏派辦理黑龍江漠河金礦事務自光緒十三年五月
由農爾根入山勘道至十四年十二月在漠河設廠開工前後出金幾及四萬兩礦務日有起色前據該
道稟稱本年夏間時患怔忡氣逆咳血頭暈夜不成寐猶能力疾治事七月以後日難支持醫言積寒已
深用心過度乞假靜養暫委該局提調候選知縣袁大化代理廠務旋接電報該道於九月初四日在差
次病故茲據袁大化等稟請具奏前來 臣查李金鏞江蘇無錫縣人同治元年由候選同知投効 軍追
漠河之議辦金礦也仰蒙 寄諭垂詢飭 臣選幹員前往籌辦地居絕徼集資匪易得人尤難當以該員
李金鏞熟悉邊情且於南中紳商信義久著奏明派令招集股分前往開辦該道以事關重大慨然自任
不敢辭避遂勘道入山裹糧露宿披榛伐木皆自古行跡所未經歷四十餘日經千九百里始達漠河向
無人煙建置之難則平地赤立購運之費則千里孤懸需費浩大口舌百端兩年以來規模粗具十五年
出金一萬九千餘兩本年正月至八月出金一萬八千餘兩取金之硃夏則盛漲冬則層冰縋深鑿堅備
形險其初礦工不耐工作旋集旋逃駕駛招徠殫盡心力現招回流民二三千人悉恃礦務以爲生計

調練防勇藉壯聲威以前日之絕域窮荒自經營金礦以來商販漸興兵民相習氣象迥非昔比邊外空虛之地得此擠撐其間隱收實邊興利之益方謂經理得人逐漸開拓有裨時局該道竟以積勞致疾遽隕其身前此奏調漠河差委之同知姚嶽崧知州劉械林等先後病歿差次皆患怔忡咯血痢狀略同蓋其地瘴癘毒惡凝寒中人而經辦事件又極勞瘁險阻也李金鏞氣體素健自到廠後始有脾瀉心悸等疾經年隨從員役相繼死亡終無退悔歿後接其病中稟牘區劃各事詳盡如常歎其忠懇之忱臨危不改卒以身殉深可痛傷合無籲懇 天恩飭部將已故三品銜吉林補用道李金鏞照軍營立功後積勞病故例從優議卹並將事蹟宣付史館仍准在無錫縣原籍自行建祠以爲絕域勸導者勸得 旨如所請行○諭裕祿奏 福陵應修各工請派員勘估一摺 福陵明樓等處工程均關緊要著派懷塔布就近敬謹勘估○庚戌以錢玉興爲四川重慶鎮總兵○辛亥 上幸 醇賢親王邸第行大祭禮○裕祿等奏光緒十五年十月間准會典館咨具奏詳陳舊圖事宜以備采輯考訂一摺行令奉天將藩界新界地方沿邊沿海口岸入海之支河汶港遴派留心地理之員周歷訪查考訂測繪列入圖中不可有誤仍列具詳說於後奏頒開方圖式予限一年照式繪具省圖及所屬府直隸州廳分圖州縣分圖解送到館等因當經通飭各該旗民地方官遵照辦理惟查奉天志乘所存地圖原係乾隆年間繪本迄今年分久

連不特旗民生聚村屯之增設甚多抑且河道遷移荒蕪日闢川原形勢亦與從前多有不同且自光緒元年以後東邊及海龍城等處分設州縣畫界分疆既非舊制吏無府圖可循自非周歷詳勘另繪新圖難期核實而開方計里尤須算學深通奉省官紳中素日究心地理精於測繪者實難其選奴才等因即咨商直隸督臣李鴻章署船政大臣閻浙督臣卞寶第調派天津水師學堂教習王慶燾福建船廠總事院學生陳清祥來奉隨同查繪藉資妥辦該教習等於七月間先後到奉即飭由省局歷各路會同地方官履勘采訪測繪詳記茲據該委員等稟稱奉省地面遼闊袤延數千餘里其間山川市鎮所在甚多每至一城週歷四境非月餘及二十餘日難以考測確實查奉省自增設州縣以來輿舊制既多同異此次繪畫輿圖自須確加釐定若必拘泥定限轉恐測繪難詳該委員等所稟委屬實在情形應請展限年餘俾令求詳舉辦仍由奴才等隨時督令從速從實不准稍涉稽延一俟全圖繪成卽行送館采輯以期妥協而昭詳慎得 旨如所請行○盛京副都統富陞卒賜卹如例○癸丑張曜奏振布政使福潤詳轉據臨清直隸州知州陶錫祺稟稱該州到任接管卷內查有咸豐十年奉文辦造臨磚三十二萬七千六百二十四塊又於同治元年奉文辦造臨磚十八萬九千二百七十六塊同治十一年奉文辦造 武英殿工程臨磚四十七萬四千七百三塊半三共磚九十九萬一千六百三塊半均經各前任領款燒造存廠

候解向係漕船搭運歷年江浙等省漕糧多歸海運豫省亦改徵折色僅恃山東糧船爲數無多迄未能
運解清楚檢查冊檔除專案解過 武英殿工程磚五萬塊 天壇等工程磚十萬塊歷年糧船搭解過
咸豐十年所派臨磚十六萬七千七百塊及現在起解磚一萬五百六十塊外計未解磚六十六萬三千
三百四十三塊半茲查廢磚僅存二十一萬九百餘塊率皆破碎酥酥不堪起運詳究短少之由實因同
治九十年衛河洪家廠塔灣光緒九年趙家村三里鋪等處節次漫決磚廠近在河干猝不及防致被
衝失現存磚塊亦係被水之後歷年既久風雨剝蝕以致毫無完整磚數甚鉅另行補造籌款維艱且查
廠座被水衝塌窖戶人等因年久停燒大半改業衛水挾沙而流每屆汛漲浩濶情形與黃河無異近察
地被沙壓無土可取種植爲難惟有將衝失磚四十五萬二千四百塊均請豁免現存破碎之磚二十一
萬九百餘塊容俟察看情形由司籌款補造分起搭解詳請具奏前來 臣覆加查核係屬實在情形並非
虧缺舞弊相應仰懇 天恩俯准將該州衝失臨磚均行豁免出自 鴻慈下工部議奏○以王之春爲
湖北布政使○以敬信爲戶部左侍郎○京口副都統鍾慶卒賜卹如例○甲寅楊昌榕奏陝甘請設電
綫以速邊報經 臣於上年會奏奉 旨允准在案隨准北洋大臣李鴻章轉飭總辦電務登萊青道盛宣
懷委湖南候補知府周冕帶同匠工人等入關勘明程途里數一面由 臣咨會徽皖江蘇各省將前借撥

限款提還電工經費按數解交並派員分投採辦木植運赴大道次第堆存備用所需電線機器等項由
盛宣懷籌備辦全分起運解本年秋間據委員周冕呈報已將直晉商綫設至陝西省城隨即接辦官綫
八月由西安動工當飭沿途州縣營汛幫同妥爲經理因甘肅氣候寒冷冰凍較早復分派員升工匠東
西兩路趕辦於十月二十日設至肅州大工告竣所有總分各局亦均安設如法一律通報由該委員具
稟前來查西路設綫諸形艱阻非東南各省可比幸賴該道盛宣懷悉心籌畫委員周冕兩次馳驅不
辭勞瘁故辦理克臻妥速經費亦屬撙節除詳細情形咨由北洋大臣會合具奏外謹會同陝西撫臣鹿
傳霖附片陳明下所司知之○以頌勒精勤爲廣東按察使○乙卯 醇賢親王金棺奉移圓寓 上幸

醇賢親王邸第行奉移禮畢請詣園日送○以胡聘之爲順天府府尹○丁巳卞寶第奏准總理各國
事務衙門咨嗣後文武汎官及外海水師營帶人等遇有中外船隻遭風觸礁將沈沒者果能奮身冒
險救出至三十人以上准其比照異常勞績奏獎但每船每次奏獎不得過兩三員等因奏奉 諭旨依
議欽此咨行到閩卽經分飭遵照在案茲准福建水師提督彭楚漢咨稱本年三月初二夜間東尾洋面
有英國太古行之中莊輪船因大霧迷失方向觸礁入水瞬將沈沒代理金門營都司陳紹勳候補千總
陳士斌等聞報帶領弁兵雇僱小船知會金門縣丞萬龍派撥丁役人等冒險馳往將該船洋人七名華

人四十餘名全行救去船主囑將黃豆餅等貨搬聚海中船始浮起十分之二復用機器將水抽盡修補救起船價詢值洋十三萬圓經廈門英國領事及稅務司疊次函謝並送還該營墊用洋銀六十元各兵酬勞四十元興泉永道吳世榮稟報相同請將出力各員弁分別奏咨獎敘前來臣覆查屬實合無仰懇 天恩俯准將代理金門營都司儘先補用守備陳紹勳俟補守備後以都司儘先補用先換頂戴儘先拔補千總陳士斌俟補千總後以水師守備補用先換頂戴藉昭激勸得 旨如所請行○富勒銘頌奏伊犁副都統二員俸廉尙未酌定前准戶部議覆伊犁副都統二缺係光緒十一年兵部議准添設其應支俸廉數目迄未據酌定額數報部應令該將軍核明支款報部核定伊犁將軍每歲加增養廉銀一千兩領隊大臣每員每年額支養廉銀七百兩另有每月每歲加增養廉銀二百兩仍令遵照舊制於伊犁牛馬稅房租項下動支均扣除六分減平自此奏准之日爲始再按十成開支以符定章等因咨會遵照前來查伊犁副都統係屬新設員缺當此地方凋敝元氣未復辦公一切諸多耗費較之內地迥不相同其應支俸廉等項擬請每年額支養廉銀一千兩俸銀一百五十五兩糧料草折銀五百六十六兩八錢七分五釐二毫隨甲四名歲支銀一百四十四兩總共歲支銀一千八百六十五兩八錢七分五釐二毫動支新餉仍扣六分減平自光緒十一年兵部議准之日爲始按照十成開支至將軍領隊大臣加

增養廉銀兩既經部議自應遵照辦理惟伊犁自兵燹後軍民困苦異常是以牛馬稅房租等項均未舉辦現已改設行省所有營後應辦事宜自光緒十六年正月初一日起悉交新疆撫臣斟酌辦理伊犁無款可籌擬仍動支新餉一俟另籌有款再行規復舊制以符定章而資久遠得 旨覽○刑戶左侍郎聯全奉賜卹如例○戊午科謝沁博多勒噶台親王伯彥訥謨祜等奏 醇賢親王飾終至奉移一切典禮業經兩次會奏在案恭查奉移國寓後所有 廟制及葬祭各事宜均應先期集議次第舉行伏讀本年十一月二十一日 懿旨恭引 高宗純皇帝御諭立廟於邸第為不祧之廟祀以天子之禮合乎父為士子為大夫葬以士祭以大夫之義等因欽此 聖訓昭垂範圍千古 臣等欽遵妥議謹分列條款繕具清單伏候 皇上恭請 懿旨遵行一 醇賢親王廟擬請於新 賜邸第恭建 欽派大臣查估承修至廟額應請謹書曰 醇賢親王廟一廟制擬建殿七楹殿外中門三間殿前東西配屋各五間殿後寢室五間中門之內建焚帛亭祭器亭中門之外建宰牲亭一座神庫五間神廚五間東西廂及治牲房各二間大門三間至殿宇及正門瓦色應用綠色琉璃或黃色琉璃恭候 懿旨一每歲時饗擬仿宋秀安僖王祀典於四仲月朔舉行由承襲王承祭前期太常寺請 旨是否親行如遇 皇上親詣行禮應以承襲王陪祀一禮節樂舞祭器祭品應欽遵 高宗純皇帝御諭祀以天子之禮由各該衙門

詳晰具奏請 旨祀文樂章均請由翰林院撰擬一立廟後恭遇 醇賢親王誕辰忌辰是否 親詣行
禮恭候 懿旨一 皇上年除服擬請 親詣行禮照大祭禮讀文致祭一恭釋 御論 醇賢親王
葬禮應查照親王例由各該衙門敬謹備辦一 醇賢親王園寢鑾殿業經建造其碑亭瓦色因碑文內
恭書 御名擬請用黃色琉璃一奉安前期擬請 皇上親詣園寓行禮照大祭禮讀文致祭奉安禮成
後擬請 親詣園寢行禮至奉安日是否 親詣恭送屆時恭候 懿旨一 醇賢親王鑾殿神牌擬請
由工部製造先期知照欽天監擇吉神牌字樣擬請 醇賢親王神位 欽派大臣恭題奉入鑾殿時
擬請 派承襲王恭奉行禮其廟內神牌擬請俟廟成後擇吉製造題寫至供奉日仍由承襲王恭奉擬
請 皇上親詣行禮所有應行禮節事宜屆時由各該衙門奏明辦理一 醇賢親王碑文是否 御製
抑由翰林院敬謹撰擬恭候 懿旨一奉安後每清明中元冬至歲暮致祭園寢擬請 派承襲王行禮
一查宋秀安僖王於立廟前班諱 醇賢親王應否諱名一字恭候 懿旨一 醇賢親王廟及園寢均
請設官員兵役看守應由該衙門酌擬奏明辦理 上諭朕欽奉 慈禧端佑康頤昭豫莊誠壽恭欽獻
皇太后懿旨御前大臣軍機大臣鈞同蘇孫家鼐會同禮部奏遵議醇賢親王廟制及葬祭各事宜分列
條款請旨遵行一摺醇賢親王廟著於新賜邸第建立其現居邸第並著另建醇賢親王祠所擬廟制著

依議行所有廟中殿宇及正門瓦色中用黃色琉璃殿脊四圍及正門四圍均用綠色琉璃其典禮應照天子之禮所有禮節樂舞祭品祭器由各該衙門詳晰具奏請旨立廟後每歲時饗壽於四仲月朔舉行由承襲王承祭皇帝是否親行先期由太常寺請旨醇賢親王祭辰誕辰皇帝均親詣行禮葬禮著照親王例辦理皇帝親製碑文其碑亭瓦色著用黃色琉璃皇帝期年除服親詣行禮照大祭禮讀文致祭至奉安前期皇帝親詣圓闕行禮照大祭禮讀文致祭奉安日親詣恭送看視奉安次日仍詣圓闕行禮歲時致祭國寢由該承襲王行禮所請避諱一節嗣後凡遇諱字著一律避寫餘均照所議辦理該衙門知道○諭劉銘傳奏假期屆滿病仍未痊籲懇開缺一摺劉銘傳著再賞假三箇月毋庸開缺所有臺澎科試事宜著派唐景崧暫行代辦○工部左侍郎烏拉布卒賜卹如例○以清安爲刑部左侍郎鳳秀爲刑部右侍郎豐烈爲盛京兵部侍郎○以桂祥爲工部右侍郎○己未以滕嗣林爲廣東瓊州鎮總兵○庚申以裕麟爲工部左侍郎○賞給資善堂米石○辛酉富勒銘額奏查伊犁漢隊改立標營業經前將軍色楞額遵照辦理分隸交劑並將餉項劃分清楚先後奏明奉 旨允准在案嗣色楞額以伊犁地方邊關非多設騎兵不可仿照伊犁馬步各半成法改設軍標步隊一營左右翼馬隊各一營格林廠後膛開花礮隊一哨計一千九十員名額外私夫夥夫並車馬各夫照章設立糧餉一切暨軍標統領馬步營哨

官月支薪水公費等項自十六年正月初一日起均按坐糧章程支給應設軍標副將以下等官未及其奏因病出缺奴才接任後體察刻下情形若不多設騎兵實屬萬難分布現擬仍照馬步各半成法辦理其軍標副將以下等官應遵照新疆奏定章程設查惠遠城兩營兵力甚單擬設副將一員軍標統領都司一員守備二員千總二員把總七員經制外委四員步隊一營馬隊一營至開花礮隊最利攻剿邊防緊要未便裁撤擬於惠遠城北關仍設開花礮隊一哨定遠城距惠遠城七十里東連甯遠西接綏定爲往來衝要實後路關鍵擬設都司一員守備一員把總四員經制外委二員馬隊兩旗至千把分汛處所俟視道路遠近酌定再行報部查核以上各營均歸副將管轄計設副將一員都司二員守備三員千總兩員把總十一員經制外委六員共官二十五員步隊一營一哨馬隊四旗共設正勇一千六十九名額外私夫夥夫並車馬夫在外總共軍標各營旗官弁廩俸薪蔬紙紅馬乾料草本折等項歲需銀六千三百二十八兩八錢七分京斗料四百九十三石七斗五升一合二勺折價銀五百九十二兩五錢一釐四毫四絲草二萬三千四十束折價銀三百四十五兩六錢另丁餉項照依撫標章程歲需銀八萬五千兩五錢六分倒馬價照章支領分別繕具清單恭呈 御覽仰懇 飭下戶兵等部議復遵辦其餘未盡事宜仍俟陸續察酌隨時奏明辦理下部議奏○癸亥以崇禮兼署刑部右侍郎○甲子始祭 太廟

上親詣行禮○沈秉成松椿圖毅奏光緒十六年江安江蘇新漕應於明春起運現由臣秉成臣剛毅督飭該糧道等遵照分撥河運臣松椿即分飭各屬員詳勘運道及應行籌備事宜均令早為辦理後經詳酌事宜熟計緩急並檢查歷屆漕濟成案擬定核實辦法謹據實陳明查江北運河綿延數百里以徐州隰屬之邳州宿遷一帶河面為最寬且淺每年夏間上游沂河水挾沙而行淤墊理所必然該處舊設七閘曰河清曰河定曰河成曰匯澤曰利運曰亨濟曰濬流向為鈐束關鍵頻年河運將各閘越河築壩堵閉使長河水均歸正閘不致暢洩易消重漕將臨船行閘門節節下板套送自應循照歷屆辦理其各閘河積淤本因光緒十三年未行河運故未挑復十五年雖行河運僅督江北十幫撥款較少不敷大加挑挖之用今夏山東雨水山水同時並漲奔騰浩瀚其勢甚驟新淤更甚於前應將淤高之處趁此水涸之際先行抽出河形俾可行溜專歸一沈藉以攻淤淤沙將來漕船行至宿遷再由微山湖放水接濟即不致因河身寬廣直洩無餘較之舊律行挑可收事半功倍之效而用款亦不致虛糜矣再查襄河屬屬向有三大閘曰福興通濟惠濟其通濟閘地居三閘之中每屆行漕時啟閉閘板以平上下二閘溜勢有關漕運樞紐多年未修底石朽木均已衝毀不齊牆石被水淘空灰縫竄水勢久可慮春間漕船過境敢板下板萬分棘手當飭貼席保護幸得無虞伏洪水勢益猛損壞情形更重設有疏虞上下二閘均

形有礙若不豫爲籌及新漕十八幫船隻千餘艘來春經過斷難使之行險微倖若拆修閘座工程浩大庫款支絀無可籌畫再三商酌撙節辦法查該閘尙有越閘一座向係堵實本爲替換正閘而設較之正閘尙覺完善擬將正閘堵閉開通越閘以利漕行惟堵閉正閘必須築堰鑲堵以遏溜勢開通越閘則有展挑開河啟堰補堤等工均非速爲趕辦不足恃以濟運所需工料嚴飭承辦之員核實估計歸於濟漕案內一併興辦其餘酌堵水口過淺挑砌各工應酌量隨時相機修治務使漕船暢行無阻惟南河協餉解欠太多款無可籌查光緒十二年江安江蘇分撥河運幫數與本屆相同是年奏撥濟漕工款江安糧道撥銀二萬兩江蘇糧道撥銀八千兩本年添辦通濟閘啟閉工程則不敷之數尙多當經臣松椿飭商江安江蘇兩糧道於照案應撥之二萬八千兩外江安糧道加籌銀八千兩江蘇糧道加籌銀一萬五千兩令其迅速籌解以便及早興辦旋據江安糧道馬恩培撥構擬照數於節省江興口糧銀兩項下動撥江蘇糧道景星烈補擬照數於節省河輪修趁銀兩項下動撥等情前來俟各該道款項解到卽妥速興辦撙節動用尙有不敷爲數無多當由臣松椿隨時湊撥濟用事竣之後歸於光緒十六年工需案內分款造銷下都知之○馬丕瑤奏臣於本年三月十三日會將桂林梧州兩府開設機坊暨繭絲免抽稅釐各情形附片具奏奉 硃批著照所請戶部知道欽此欽遵在案臣維農桑並重地利當與自開辦蠶桑

以來加意勸近省一帶民情興起爭趨第恐宜於此或不宜於彼便民或未必便商本年八月遵旨
巡閱出省沿途接見官紳詢察土宜就所見聞互相印證乃知廣西桑蠶之利有三宜三便亦有一難
為 皇上陳之蠶性宜暖北地嚴寒只春夏一造故三月為蠶月廣西四季溫和無時不可養蠶平樂以
上可四五造梧潯以上可六七造昔稱交廣鄉供八蠶之棉徵之賈信是天時之宜一廣西水繁山後除
石田童山不宜種植又或膏腴成漿不必改奪種桑外其餘近山坡地尚多閒曠草木叢雜經冬葱鬱兩
山之閒澗水停積若以種桑可收地利灌蔭亦便所過潯梧府屬之平南藤縣兩岸桑林枝多葉茂間之
土人云交秋蠶已七造桑葉漸稀芟去旁枝入春新條愈暢且柔潤最宜蠶食推之他處當亦同然是地
利之宜一廣西民風樸樸搢紳之家能嫻禮法其鄉村貧苦婦女并曰親操耕樵自給不諳女紅間即
博雜處墟市姦拐益生若令事蠶樂業安居穩利倍徙浮蕩之習不戒自除況田有凶荒蠶無旱澇能養
必收風氣已開聞者爭思學織則人事之宜三至創辦伊始縑織需人指示廣東順德所出絲綢通行已
久工匠精夥招致西來舟行立至一便也桑蠶器具多資竹木合屬所植匪野彌山仿式自製並可省費
二便也廣西各府皆通河道蒼梧為眾水所歸無論何府所出綢疋悉可順流達梧並至廣東四達通
卽與蘇杭綢絲暢行相等商運靈捷三便也夫既有三宜三便何以歷任撫臣疊議興辦或作或輟至今

猶未易行者則以有二難在一難於綱疋釐稅之徵綜計開辦以來桂梧兩局約可得絲兩萬餘斤容藤兩縣共得絲五萬餘斤其餘各屬出絲或一萬或千數百斤不等查東販來梧屬設棧收買者不下八九家官局雖有織成綱疋購絲者多購綱者少則以絲斤既免稅釐較可獲利綱疋須獨完納價重難銷夫官設機坊原爲民倡須令民間自能織綱通行利源乃可廣遠且自絲自織不至爲商販抑勒絲價廣西向不出綱本無此項釐稅今卽請免無損於課有益於民擬懇 恩施豁免廣西新出綱疋稅釐於機頭上另織廣西某府州縣機房新造某綱概免出境釐稅字樣所過關卡驗行無滯綱既通行民必爭思學織卽可漸成行業非徒通商正以利民一難於官紳倡辦之力種桑養蠶教練設機在在需資廣西缺少瘠苦戶鮮殷實官難賠墊紳無餘財辦理本屬不易今於無可設法之中立一集股之法多者每股五十金少者一金或數錢均爲一股分少合多衆舉易舉現在平樂府屬之賀縣梧州府屬之岑溪集股盛行成效昭著然非才幹之員實心愛民及公正紳耆協同辦理不克通籌無弊夫勸課農商本地方官分所應爲何敢妄邀獎敘然場圃耕桑譜入陶風之圖繪雞豚材木悉勞仁政之經營家長代謀子孫生計官長代謀黎庶身家衣食足而禮讓興飢寒迫而盜賊起不敢不爲是兢兢也況廣西兵燹之後元氣未復粵民儉而不勤全恃賢有司孜孜勸導若不擇舉賢能稍示優異不足以振吏治而樹風聲擬懇 恩施

於各屬辦理蠶桑確有實效者或官或紳擇優奏保以勵其餘是二者皆係因時酌請獎去二難以收三
宜三便之全功倘仰荷 天恩俯如所請免網足之繳稅商運日多獎賢幹之官紳羣心一振將見大利
蔚興邊民樂業庶冀仰副 朝廷實邊教養之仁恩得 旨知道了廣西新出網足著准免稅將辦理有
效之官紳准其擇尤酌保數員毋許冒濫○德縣奏湖口縣城外武曲港梅家洲兩處礮臺按月由礮勇
操演打靶礮臺口門每有震損且地勢潮濕間生白蟻曾據管帶礮臺營官具報將震損處所隨時修整
白蟻掃穴殲除現當冬晴水涸之時礮臺礮堤曾否完好應否大加興修必須親加逐細勘明以昭慎
重而固江防當將 衙門日行事件暫委藩司代行其緊要事件仍包封送 行次核辦隨於十二月十
九日封築後輒與減從山省起程乘坐紮電輪船前往沿途水淺且北風大作於二十一日始行抵湖口
縣會同湖口鎮 丁讓方帶同駐防礮臺營官劉萬驥逐加勘視查武曲港礮臺在石鍾山下地勢尚高
梅家洲礮臺勢處稍低邵湖長江兩處盛漲之時臺址不免淹浸至冬間水落歸槽臺身顯露現在勘明
各礮臺四圍礮堤均尚堅固礮臺口門俱經修整完好其餘藥庫礮房再加黏補工費有限尚可毋庸大
加拆修惟白蟻萌生處所當此冬令蟻蟄咸俯藏匿土內當即督飭弁勇掘土尺深跟蹤搜尋節節殲除
淨盡不使稍留餘孽以杜蔓延而堅壁壘一面調集駐守礮臺弁勇丁將各礮當場演放打靶俱尚有

準炸彈一律開花並飭諭將礮位時時擦洗勤加操演務期命中及連洲量無差毋得懈弛以備不虞正
在查勘辦理完竣間適新授兩江督臣劉坤一由湖南原籍起程請 旨赴京 陛見迎攬北上道經湖
口途次與臣相遇面商地方一切事宜隨乘輪上駛臣即於十二月二十七日回省報聞○是年日斯巴
尼亞國署理使臣吳禮巴抵任○統計出口貨直銀八千七百十四萬四千四百八十兩進口貨直銀一
萬二千七百九萬三千四百八十一兩相抵虧三千三百九十四萬一兩凡徵貨稅銀二千一百九十九
萬六千二百二十六兩

光緒十七年辛卯春正月丙寅朔丑刻 上詣 奉先殿行禮寅刻詣 堂子行禮辰刻詣 慈寧宮行
禮御中和殿受禮太和殿受賀巳刻詣 大高殿 壽皇殿行禮○己巳諭上年朕二旬萬壽誕經單敷
闕澤將京外文武大員老親年逾八十者優加賞賚茲復據兵部及各督撫續查海澄公黃懋澄等老親
均年逾八旬愛養承歡允宜一體施恩以昭盛典海澄公黃懋澄之祖母王氏福建水師提督彭楚漢之
母黃氏福建臺灣澎湖鎮總兵吳宏洛之母孔氏山東曹州鎮總兵王連三之母錢氏甘肅寶真鎮總兵
衛汝賓之母王氏甘肅新驛阿克蘇鎮總兵黃萬鵬之母楊氏前安徽壽春鎮總兵郭寶昌之母曹氏湖
北漢陽協副將樊國泰之母何氏湖北荊州協副將李家昌之父李成德母蔣氏廣東肇慶協副將經明

之母何氏陝西靖遠協副將李放珠之母閩氏甘肅提標中軍副將饒岳忠之母楊氏貴州三江協副將王廷喜之母何氏著各賞給御書匾額一面紫檀三鑽玉如意一柄小卷江綢袍褂料二件小卷八綵緞袍褂二件用示錫類施恩至意○辛未祈穀於上帝○世鐸等奏查軍機處歷年所有漢字諭旨寄信及議覆等項冊檔前於咸豐四年奏明每屆三年繕辦一次自光緒十三年辦理以後本年復屆繕辦之期前於三月內奏請繕錄並聲明將出力之供事隨案擬保奉旨依議欽此○等遵即查照成例傳內閣中書十六員分冊繕寫並改派軍機章京總司校勘計自光緒十三年正月起到十五年十二月止共三十七冊又逐日登計號簿十二冊又洋務檔四冊又電寄檔三冊又引見檔六冊早事檔十三冊並將積年舊檔一律補綴齊全查歷屆辦理清漢檔冊告竣均經奏蒙賞給議敘在案此次繕寫三年檔案並將積年各檔檔督飭供事人等修補完善所有承辦各員及在館供事等司否比較歷屆告竣之例酌量給議敘出自天恩如蒙俞允等查明各該員功課及供事分別等第咨部辦理得有如所議行○癸酉時享太廟上親詣行禮○乙亥薛福成奏查英屬香港一島華民流寓者十四五萬逼近廣東省城尤為中外往來咽喉凡華洋各商貨均先至香港然後轉運各省其交涉事件之繁難者一曰逃犯一曰走私一曰海界以該處並無華員無以通中外之情於廣東全省政務每多并格是商

設領事實於大局尤關緊要前任使臣郭嵩焘有此志而未及辦曾紀澤任內曾經照會英外部數次迄無成議揣其隱情蓋因全島多寓華民而洋人不過數千若准設華官與廣東大吏聲息相通在彼不免多煩顧慮所以靳而未許也昨辦文與外部按照公法商定通例而未明提香港該外部侍郎山特生果向英文參贊馬格理以香港一處為疑且云恐華官不習外務或竟使越分致多齟齬也思新嘉坡領事左秉隆與英官頗能相得外部亦稱其辦理妥洽因道馬格理告以香港若設領事當以左秉隆調往開辦察其辭意似尚易商惟遇事設法支展必再四催問而始辦則外部之常例也容俟覆文到日如仍不遽允也再當相機辯論下總理各國事務衙門議奏○丁丑李鴻章奏海軍衙門奏定北洋海軍章程案內聲明章程有未備及臨時應行變通者隨時酌擬具奏等因查北洋海軍精練後營學堂係原有水師屯船改設專為招募沿海幼童練習兵輪水手技藝以備各船挑補缺額之用屯船月支公費銀四十兩自改為練勇學堂並未議定公費數目經海軍提督丁汝昌以該學堂營房操棚比較屯船處所為多應需費用即較屯船有增酌擬月給公費銀六十兩當飭海防支應局會同直隸臬司周馥議覆查明水師屯船月支公費銀四十兩歷經造報准銷有案今既改為精練後營移駐劉公島練勇局學堂每月應需油燭紙張並購辦修繕鉛鐵料物及添置一切零件費用較船內為繁每月至少須加銀二十兩

擬月給公費銀六十兩自光緒十五年正月起支在海軍雜支等項歲需三萬兩欸內勻撥又海軍章程內載書識在船當差月支銀十二兩在岸當差月支銀九兩親兵在船當差月支銀六兩在岸當差月支銀四兩五錢惟提標書識六名親兵二十名未分在船在岸各幾名從前月支餉項均照在岸核給惟海軍提督常年駐船督率操練其分撥在船當差者未嘗累經該提督派定除在岸書識親兵薪糧仍照章開支外其在船書識四名每名月加銀三兩共十二兩在船親兵八名每名月加銀一兩五錢共十二兩均與定章相符合共月加銀二十四兩亦自光緒十五年正月起支由支應局司道詳請奏咨立案前來臣覆核無異除咨海軍衙門戶部兵部立案外理合陳明得 旨該衙門知道○戊寅諭前據都察院奏已革福建建甯府知府蔣斯岱以被參冤抑案懸莫結並劣員營謀署缺賄囑舞弊等詞赴該衙門呈控當派員恆沈源深前往查辦茲據查明覆奏此案舉人王濟光以梁玉瑜署缺到班經奏撥轉託關照卽函致沈茂勝聲稱係伊從中爲力囑向梁玉瑜索得銀兩係屬誑騙已成王濟光卽王仲霖著革去舉人其應得罪名業經病故著毋庸議已革知府梁玉瑜以署缺到班託沈茂勝栽培並求王濟光關照迨至委署建甯府缺輒信王濟光從中爲力之旨付銀酬謝雖訊係事前空言囑託並非以財行求究屬失洩營幹梁玉瑜著發往新疆効力贖罪已革提督沈茂勝因王濟光致函囑伊向梁玉瑜索銀兩隨卽

轉達並派人送交該革員以武職大員不知自愛輒代人過付贓私事發後猶敢捏詞掩飾沈茂勝著發往軍臺効力贖罪江蘇候補道劉麒麟以梁玉瑜著缺電告沈茂勝已屬不知違嫌追查取電報輒復扶同捏飾意存徇隱劉麒麟著交部議處已革知府蔣斯岱始則請緩委署挾制具稟繼則抗不交印其迭次呈稟訐告各情多有失實過當之詞惟查明梁玉瑜等實有營謀情事究非無因業經革職著免其置議已革州同銜縣丞袁光裕訊無串謀唆弄情事著准其開復調任陝甘總督前閩浙總督楊昌濬於梁玉瑜著缺並無受人請託情事惟幕友誑案得賄失於覺察著交部議處閩浙總督卞寶第審辦此案迭經嚴飭兩司訊辦並非瞻徇情面楊昌濬卞寶第因案內供詞各執並提傳人證日久未能審結所有該督暨兩司等承審遲延各職名著該部查明分別察議○辛巳以松林爲山東按察使○乙酉升秦奏奴才前將派員赴邊辦理新約三端摺具奏在案嗣因奉派委員嵇志文患病懇請回省就醫奴才以該員前辦邊務尙著微勞現在陡患風濕難期速愈並無經手未完事件自應准如所請給資回川以示體恤惟辦理善後事關緊要未便以該員患病致稽時日當卽一面函知赫政另由奴才揀員前往辦理旋於十一月十四日准四川督臣劉秉璋轉咨承准總理各國事務衙門電開赫政德接赫政電印度詢約內應議未結三款曾否派員會議等語希卽遵派委員前往會同商辦詳酌飭赫政電知本署核定請 旨

較爲安速等因同日復准赫政來函轉准孟加臘巡撫白禮文稱事同前因奴才查臺員之中除拉里糧務稽志文而外在臺最久者惟前派開導委員西藏糧務黃紹勳所有藏番一切情形頗爲熟悉自充開導委員而後交涉事件亦極經心今稽志文因病不能前往而宜另派委員接辦以專責成應卽以開導委員西藏糧務黃紹勳遴派前往惟該員前於奴才赴領赴印之際未克隨行恐於洋員一切情形尙有未諳當添派前次隨同奴才到領到印文案委員卽選府教授張助一同前往會辦未便拘約上僅派委員一人之語用昭慎重請 飭總理各國事務衙門告知赫德轉電印督知照奴才擬再接赫政來信後俟印督揀定洋員約期往辦時卽飭令該二員迅速東裝由藏起程會同洋員妥爲商辦再由奴才詳酌電知總理各國事務衙門核定請 旨遵行下所司知之○升泰奏奴才前於藏印邊案完結請將出力漢番員弁量予獎敘一摺內開單掌辦西藏商上事務第穆呼圖克圖阿旺洛桑稱勒拉普結懇 恩賞加封號於本年八月二十二日奉 硃批著照所請該衙門知道欽此欽遵隨於十一月初六日接准理藩院咨行以爲該第穆呼圖克圖懇請 賞加封號一節應請 旨飭下駐藏大臣查照同治五年剿辦瞻對成案指定何項名號奏明辦理等語 奴才查剿辦瞻對案內惟察木多帕克巴拉呼圖克圖阿旺洛桑濟克美丹貝堅參曾經請加靖遠禪師名號今查該第穆呼圖克圖向爲僧衆敬服此次辦理藏印交

涉僧衆往往梗議均經該第穆呼圖克圖恪遵開導曉以利害箝制其口始得邊事轉危爲安俾以保全
比照同治五年所獎察木多帕克巴拉呼圖克圖原保內僅因好義急公請獎核其勛勞尤爲懋著合無
仰懇 天恩將該第穆呼圖克圖阿旺落桑稱勒拉普結 賞加靖習禪師名號抑或 優加褒賞靖習
國師名號以示隆異之處奴才未敢擅擬懇請 特恩飭理藩院查照遵行下所司議奏○丙戌裕祿編
宜奏查前准戶部咨開令將應徵釐捐糧貨各稅銀錢務照定額實力徵收毋得隱匿偷漏總期多進一
分稅課即可多裕一分餉源等因歷經飭飭各該地方官遵辦在案奴才等伏查奉省釐捐一項係爲抵
充額餉收歛大宗其中抽收總以商販外來糧石及本地產糧爲要至於雜貨收捐不過十分之二二溯
自咸豐六年開辦起每年所收釐捐總在一百二十萬千有奇同治年間亦在一百萬餘千近年以來
海禁大開商賈稠密糧貨雲集每年僅收錢七八十萬千較之咸豐同治年間所收之數虧短甚鉅糧貨
日增而釐捐日少推原其故委因奉天各河口自開辦河運以來奸狡商民販運外來糧石及本地產糧
視城市設有釐捐以爲畏途遂至取巧並不報明亦不納捐陰赴沿河一帶村屯集鎮與農民私相交兌
運赴他處銷售不惟釐捐偷漏卽斗租河稅亦無從徵收約計各沿河一帶村屯每年私運雜糧總在一
百餘萬石偷漏釐捐不下十餘萬千糧石如此貨物不問可知雖經各該地方官派差查禁既無專員經

理難保不無私縱情弊況村屯林立河口紛歧稽查更屬難周若不及早整頓最爲變通則積習既久偷漏尤滋不惟正額有虧實與餉糈大有關係查奉天牛莊所屬之三岔河口係各流扼要之區來往船隻必經之路該處雖經派委旗員會同部員每於開河起至封河止輪替在彼駐守原爲稽查無票私船其船載糧實是否私運有無偷漏盤捐向無稽徵之責今擬仿照查船章程於該河口設立補徵分卡一處派委旗員會同部員令其攜帶兵書在彼補收偷漏盤捐每於過往船隻載運糧貨過卡認真查驗如已在各城鎮官過盤捐驗有憑照免其再徵外其村屯集鎮私相交兌未經完過盤捐者均照盤捐定章按每糧一石補收東錢一百文雜貨按其斤重價值核准糧食一石亦補收東錢一百文核實稽徵不准絲毫侵隱以裕餉源其開銷兵書飯食等項錢文並照向章一律辦理所收課稅仍歸入盤捐款內存儲如此辦理則彼端此徵奸商難再取巧而盤捐更可踴躍餉糈藉以稍充矣如蒙 俞允本年各項販運至京糧石已奉 旨暫行免捐奴才等擬自明春開河起卽會派委員前往試辦如果辦有成效請無窒礙再行報部立案下戶部知之○丁亥諭朕欽奉 慈禧端佑康頤昭豫莊誠壽恭欽獻崇熙皇太后懿旨建立醇賢親王廟工程著派福錕李鴻藻查估承修醇賢親王祠工程著派熙敬許應駟查估承修○諭浙江布政使許應鑾著開缺來京另候簡用○阿克達春奏前據統領威靖營記名提督李得勝稟稱該營駐

紫毫州北關外距城三里餘有三皇廟一座當同治初年爲博多勒噶台親王僧格林沁收儲軍火之處
尙有炸礮火箭零星殘缺各件封存在內該處操防火藥亦卽存此後樓一座已十有餘年該統領於八
月初旬帶隊赴蒙城應候閱伍僅留弁勇看守接據毫州知州陳晉報稱八月十五日巳刻三皇廟後樓
火藥陡然爆炸聲震異常該州馳往救護查知該營操防火藥連同治初年舊存炸礮火箭等件同時轟
發以致人民房屋均有燬傷計雜斃壓死男婦老幼七十六名口草房瓦屋在鄰近者轟燬一百數十間
祠廟會館房屋亦間有轟震之處該州立時捐資分別撫恤該統領聞報趕卽捐資委員解毫鳳嶺六泗
道王廉亦籌款委解踵至合之該州陳晉並衆紳商共捐錢八千餘串由該州分別死傷及燬震房屋輕
重情形儘數撫恤同時接據該管道州等具報等因當經前撫臣沈秉成委候補道袁秉楨會同鳳嶺六
泗道王廉往查確切情形籌款加撫稟候核辦茲據該道等稟稱查照威靖營操防火藥存儲三皇廟後
樓共計六百六十餘斤係派儘先都司任效順儘先把總傅懷年經管八月初八日任效順押運軍火前
赴蒙城留傅懷年帶同勇丁李炳全看守平時屬鎮慎固惟樓北隔牆文昌殿亦係樓屋三間看守弁勇
宿北樓下此次火發之由訪詢附近居民據稱廟中曾作木工木匠及守藥勇丁均在文昌殿內煮飯時
天氣旱乾亢燥已極或因炊爨遺火所致惟匠作弁勇當時被火轟斃無可究詰該營鎮礮軍械向係另

存他所並無遺失至死傷人口以及震房屋先經亳州知州陳晉德捐款八千餘串撫恤居民已漸次蓋房復業惟念死傷家屬多係貧民轉瞬隆冬嚴寒困苦殊堪憫惻至祠廟會館震房屋亦應量有津貼俾資修葺該道等現在設法籌款督同亳州官紳覆查被災輕重情形分別加撫務期實惠均霑無使災黎失所並查開經管火藥職名詳請奏參前來查此案前撫臣沈秉成於聞報委查後因赴皖北因伍就近察核災情回省未及具奏卽行交卸臣接護撫篆行催該道等查悉前因如所稱勇丁匠役炊爨遭火所致雖無從證實而防範疏忽誠屬均無可辭惟把總傅懷年勇丁李炳全均已被轟身死應請卹卹置議都司任效順雖因公前赴蒙城究有典守之職未便諉卸相應請 旨將儘先都司任效順卽行革職以示懲儆得 旨如所請行○戊子德福奏查前任都統延煦因熱河官兵軍械多有損失擬請由每年官兵應領俸餉內每銀一兩捐扣一分一年可捐扣一千兩有奇再由園場地課項下每年借撥銀二千兩共銀三千兩有奇計數修補一旗軍械之用滿洲八旗分作八年蒙古二翼分作二年共計十年修補完竣至所借地課之款請於修補完竣後仍按官兵俸餉每銀一兩捐扣一分分年扣還等因奉 諭旨著照所請該部知道欽此欽遵於光緒五年在本處設廠招匠修造至光緒十四年十二月間一律修補整齊經前都統謙禧奏明在案捐修軍械共計十年所借園場地課銀二萬兩應由光緒十五年起

分作二十年方能掃數歸清惟是駐防官兵因修理軍械應得俸餉每銀一兩扣一分必須三十年始行
捫扣完畢查該兵丁等餉銀僅領八成加以近年水旱頻仍諸物昂貴生計維艱再加月扣抵還扣修軍
械之款實屬異常寒苦奴才目覩情形自應設法補救總期兵丁稍紓困累方足以仰副 聖主矜恤旗
僕之至意奴才到任後查核右司庫儲及各卷宗內有本年五月間經協領穆哈服等呈明前任都統謙
福有飭熱河道發商生息銀一欸計一萬一千二百兩每月照案以一分生息此銀係八旗官員積年捐
款集有成數以備生息分放各旗資助貧寒等項各營果共歲得恩銀一千三百四十四兩查此項恩銀
實係不爲必需品奴才擬將此項生息銀每年撥還國課銀一千兩其餘恩銀三百四十四兩津貼各
項緊要差費間以資助貧寒一俟國課歸清再將此項生息全行資助貧寒動用如此辦理於所借國課
無虧兵丁困苦藉可稍紓其光緒十五十六兩年已由官兵扣還銀二千兩有奇尙欠國課銀一萬八千
兩之數合無仰懇 天恩俯准自光緒十七年爲始由此項恩銀分年撥還所有官兵扣扣一律停止以
示體恤如蒙 俞允所借國課一俟將來歸還清楚再行奏 聞得 旨如所請行○以實教恩爲浙江
布政使長祿爲河南按察使○己丑諭三載考績爲國家黜陟大典中外滿漢諸臣有能恪共職守勞勩
最著者允宜特加甄敘以示優容茲當京察屆期吏部開單題請詳加披閱職親王世鐸大學士額勒和

布張之萬兵部尙書許庚身刑部尙書孫毓汶劉寶楹廷公忠其矢襄理庶務深合機宜均著交該衙門從優議敘大學士直隸總督李鴻章久任畿疆勲勞懋著著交部從優議敘湖廣總督張之洞山東巡撫張曜實心任事勞勩不辭均著交部議敘○庚寅 上御紫光閣英俄法美日比和日本義奧等國正署公使參贊繙譯等三十二人覲見○諭本年輪應查閱直隸山西陝西四川甘肅五省營伍之期直隸卽派李鴻章山西卽派劉瑞祺陝西卽派鹿傳霖四川卽派劉秉璋甘肅卽派楊昌溶逐一查閱認真簡校如有訓練不精軍實不齊者卽將廢弛之將弁據實參奏毋得視為具文○諭吏部奏遵議處分一摺前閩浙總督調任陝甘總督楊昌溶應得降一級調用處分著准其抵銷○壬辰沈秉成奏准長江水師提臣李成謀咨稱提標中營火藥局建在太平府城內東南隅空曠隨處四面溝水環繞該中軍副將謝溶會照章派委署右哨都司滕俊經管因該都司有訓練兵丁巡查江面緝捕盜匪之責添派候補千總唐敏超專司看守局鎖甚固遇有收發軍火仍歸該都司經理入秋以來天時日久該副將等以火藥乾燥爲虞屢諭該弁加意防範忽於九月二十日巳刻庫藥轟裂聲震如雷火烈風狂須臾間全局燒盡守局弁兵千總唐敏超軍功李藻臣均被燒斃無從查悉起火之由當經該副將等會同地方文武員弁協力施救將火撲滅查點局儲火藥鎗子並銅帽火廢鎗礮等件轟燬無餘又會勘轟斃壓斃營兵三名男婦

大小民人十七名口當卽捐廉給棺收殮受傷居民五十餘人亦卽給醫調治均無性命之虞其被飛火延燒民間房屋草房一百二戶瓦房震落瓦片草房揭去草茅一百一十一戶又文昌廟正殿傾頽餘屋震損當塗縣學大成殿屋瓦半有震傷東西兩廡震倒餘屋震損該副將報由提臣李成謀先捐洋銀二千元札交當塗縣查撫被災民其火藥局經管稽查各員咨請照例奏參並請將火藥軍裝酌量補發等因前來臣在安徽巡撫本任內先據調署太平府知府吳潮當塗縣知縣葉大烜稟報該縣是日正在局試文童倉猝聞警竭力救熄捐廉辦撫大略情形當飭藩司籌撥銀二千兩委員馳往會同該縣查明轟斃家屬受傷人口及焚燬損壞瓦屋草房分別輕重實情按戶計口發給撫恤津貼修理其震壞之文昌廟大成殿一面設法修葺旋據該縣委稟覆查放完竣民情安謐在臣交卸之際迭請奏報准咨前來此次火藥因何轟炸守局弁兵唐敏超等當時同斃雖已無可究詰總由該弁兵等看守不慎致遭火災自有應得之咎惟已身死應請毋庸置議署長江提標中營右哨都司本任該營後哨守備滕俊有經營軍火之責記名總兵長江提標中營副將謝溶裔有稽查之責雖災患生於意外亦屬咎無可辭相應請旨分別照例議處得旨滕俊等著交部照例議處仍著將被災戶口妥爲撫恤毋任失所○癸巳岐元劉秉璋奏查上年春間雷波夷匪小溝補卽夷支風簸魚姑等句結生番出巢滋擾邊境臣等

調營往剿曾將迭次獲勝情形奏陳嗣於田家灣等處復獲勝仗奏奉 硃批著俟事定後擇尤保獎毋
許冒濫欽此當卽轉行在案嗣據連字營統領馬朝選等陸續稟報以各支夷人皆有投誠之意惟小溝
魚姑兩支始終怙惡恃其夷巢險峻二百餘年從無官軍深入且有二千餘人匪黨相爲勾結不肯乞降
迭遣土舍熟夷前往開導迄無轉機自非直搗其巢不能懾服營務處候選道徐春榮定議以進攻不可
再避庶免曠日持久獲俘不必盡殺庶使懷德投誠遂於十月十六七等日會同儘先參將謝金詒記名
提督劉玉田唐珊峯都司銜姚振榜等各帶所部連營進紮於二十日夜各營齊發維時霜雪凝寒路途
凍裂將備弁勇一鼓作氣攀藤附葛銜枚疾走直搗小溝夷巢連破二坪子仰天臥等處摧堅陷銳所向
無前陣斬逆酋黑夷百餘名生擒二十餘名擄獲黑白兇夷二百餘名追殺至二十一日晌午始各收隊
探知風簸身受重傷魚姑隻身潛遁其兄弟子姪瑣簪哇初必模等及二支夷酋隨各帶同哇子數百名
來詣各營帶營前乞恩免剿自限三日內將所捆難民百餘人全數繳出傾心投誠誓不復反通計雷夷
二十六支所有各支七千百戶及黑夷自一百五十二名各支長標子白夷三百二十名均於十一月二
十六日齊集到驛各營隊伍亦均拔隊回城經署該驛西慶署參將謝金詒諭以兵威陳以利害責其
糾衆出反之罪宣示 朝廷寬大之恩各支夷酋均各感激悚惶叩頭謝罪認保隘口伏地求憐仍定期

十二月初七日齊集校場大設軍威查照夷例開皮飲血誓不復反當卽賞給布疋銀牌牌嘍花線鹽酒該夷等歡欣鼓舞而退並令瑣賡呼曲二酋在城當差餘均分遣回巢邊境肅清等情前來臣等會同商酌除飭各營分別回防外擬暫留唐珊峯一營駐紮雷波邊隘以期有備無患並飭該文武等將善後一切事宜妥爲布置用副 聖主綏靖邊陲之至意此次雷波夷務綜計大小數十戰生擒及陣斬盡斃共千餘名攻克堅巢五十餘座奪獲刀矛氍衫千餘件焚燒蠻棚二千餘間小溝系稱廣悍現既懾服則各支必益帖然各將備弁勇合無仰懇 天恩准將尤爲出力之記名總兵馬朝選 賞加提督銜已革頭品頂戴花翎記名提督劉玉田 賞還原銜翎頂記名提督唐珊峯 賞給頭品頂戴總兵銜補用副將四川儘先參將謝金詰准其免補參將以副將儘先補用統領長勝先鋒等營二品銜雙月選用道徐春榮以道員不論雙單月儘先選用都司銜姚振榜以都司儘先補用以示鼓勵而作士氣出自 聖慈逾格此外各營出力將士員弁兵勇及傷亡勇目容臣等核實查明擇尤分別保獎請卹另行奏咨辦理上諭岐元劉秉璋奏剿辦雷波夷匪獲勝邊境肅清一摺雷波夷匪滋擾四川邊境迭經岐元等調營進剿大小溝魚姑二支夷匪始終怙惡道員徐春榮會同參將謝金詰等於上年十月間督軍進剿小溝夷巢大小數十戰連破二坪子等處擒斬盡斃千餘名攻克堅巢五十餘座奪獲刀矛千餘件共焚燬蠻棚

二千餘間該夷酋等及二支夷酋乞恩就撫邊境肅清辦理尙爲迅速所有尤爲出力之總兵馬朝選著賞給提督銜已革提督劉玉田著賞還原銜領頂提督唐珊率著賞給頭品頂戴參將謝金諧著免補參將以副將儘先補用道員徐春榮著以道員不論雙單月儘先選用都司銜姚振榜著以都司儘先補用以示鼓勵其餘出力員弁及傷亡勇丁著查明分別奏咨獎勵○以龍湛霖爲內閣學士